

An Exposition of the  
**Seven Church Ages**

Chapter Six

**Kereke Ya Paka Ya Thiatira**

Tshenolo 2:18-29

*"Mme o kwalele moengele wa phuthego e e mo Thiatira, o re: 'Morwa Modimo, yo matlho a gagwe a ntseng jaaka kgabo ya molelo, le dinao tsa gagwe di ntseng jaaka kgotlho e e gotlhweng, o bua dilo tse, a re;*

*Ke a di itse ditiro tsa gago, le lorato lwa gago, le tumelo, le tirelo, le bopelotelele, le gore ditiro tsa gago tsa morago di feta tsa ntlha.*

*Mme ke go nyaletsa selo se, gore o leseletsa mosadi yo go tweng Jesebele, yo o ipitsang moperofeti wa sesadi; o a ruta, o fepisetsa batlhanka ba me mo kgokafalong, le mo go jeng dilo tse di iseditsweng medimo ya disetwa ditlhabelo.*

*Mme ka mo naya lobaka gore a ikwatlhaye; mme ga a rate go ikwatlhaela kgokafalo ya gagwe.*

*Bona, ene ke mo latlhela mo bolaong, le ba ba dirang boaka nae, mo pitlaganong e kgolo, fa ba sa ikwatlhaele ditiro tsa bone.*

*Ke tlaa bolaya bana ba gagwe ka loso; mme diphuthego tsotlhe di tlaa itse fa ke le ene yo ke hukutsang diphilo le dipelo; ke tlaa naya mongwe le mongwe wa lona ka fa ditirong tsa lona.*

*Mme ke raya lona, e bong lona ba lo setseng mo Thiatira, e le ba lo kwa ntle ga thuto e, lo sa itse dilo tse di boteng tsa ga Satane, jaaka di tle di bidiwe jalo; ka re, ga ke lo beye morwalo ope o sele.*

*Le fa go ntse jalo, se lo nang naso lo se tshware thata, go tle go tsamaye ke tle.*

*Yo o fenyang, le yo o bolokelang ditiro tsa me go ya kwa bofelong, ke ene yo ke tlaa mo nayang taolo mo merafeng:*

*Mme o tlaa e laola ka tsamma ya tshipi; fela jaaka dijana tsa mmopi di tle di thubaganngwe; jaaka le nna ke amogetse mo go Rre.*

*Mme ke tlaa mo naya naledi ya moso.*

*Yo o nang le tsebe, a a utlwe se Mowa o se buang le diphuthego."*

**Thiatira**

Go ya ka ditso, toropo ya Thiatira e ne e le one o o neng o se botlhokwa thata mo toropong tsotlhe tse supa tsa Tshenolo. E ne e le mo melerwaneng ya Mysia le Ionia. E ne e dikologilwe ke dinoka di le dintsi, mme di ne di tletse ka menyophi. Karolo ya yone e emolemo e ne ele gore e ne e humile ka lebaka ka ntlha ya mekgatlho ya badiri ba dipitsa tsa letsopa, ba ba dirang ka letlalo, ba ba logang, ba ba fetolang mebala, ba ba dirang diaparao, jalo le jalo. Lidia, morekisi wa leloba le le phepole, o ne a tswa mo motseng ono. E ne e le ene Mo-Yuropa wa ntlha wa ga Paulo go sokologa.

Jaanong lebaka la go bo Moya o ile wa tlhophisa toropo e gore e nne yone e e setseng e na le dilo tsa semoya mo motlheng wa bonè e ne e le ka ntlha ya bodumedi jwa yone. Bodumedi jo bogolo jwa kwa Thiatira e ne e le kobamelo ya ga Apollo Tyrimnaios e e neng e kopanngwa le kobamelo ya mmusimogolo. Apollo e ne e le modimo wa letsatsi, e bile e ne e le ene yo o latelang rraagwe e bong Seuse ka maatla. O ne a itsiwe e le 'yo o tlhagisang bosula'; o ne a okametse molao wa bodumedi le tetlanyo (tsela ya go dira tetlanyo, go baakanya phoso kgotsa molato). Plato o ne a bua jaana ka ene: "O tlhalosetsa batho ka ga go tlhomiwa ga ditempele, ditlhabelo le ditirelo tsa medimo, kwantle ga meetlo e e amanang le loso le botshelo morago ga loso." O ne a bolelela batho ka kitso ya gagwe ya 'bokamoso' le 'thato ya ga rraagwe' a dirisa baporofeti le baporofeti. Kwa Thiatira moletlo o o ne o dirwa ke moporofeti wa mosadi yo o neng o ntse mo setulong se se nang le setulo sa maoto a mararo a bo a bolela melaetsa fa a ntse a le momoweng.

Bodumedi jono bo ne bo na le tlhotlhetso e kgolo. Maatla a yone a a boitshegang a ne a sa ikaega fela ka masaitseweng, mme a ne a ikaegile ka gore go ne go se na ope yo o neng a ka nna leloko la makoko a a neng a tlamela batho ka dijo fa e se fela fa a ne a le leloko la kobamelo ya tempele ya ga

Apollo. Opefela yo o neng a gana go nna le seabe mo meletlong ya kobamelo ya medingwana le mo meletlong ya boitsholo jo bo sa siamang o ne a thibelwa go tsena mo manyalong a a nako ya lekgolo la ntlha la dingwaga. Gore motho a nne karolo ya botshelo jwa loago le jwa kgwebo o ne a tshwanetse go nna moobamedi wa medimo ya disetwa wa moheitane.

Go bothokwa go ela tlhoko gore leina Thyatire ka bolone le kaya gore, "Mosadi yo o Laolang". Ka jalo paka e e supywa ke maatla a a laolang, maatla a a tlaselang batho botlhe a sa ba utlwele botlhoko, a ba fenywa botlhe e bile a ba laola ka tsela e e setlhogo. Jaanong mosadi yo o busang ke phutso e kgolo go di gaisa tsotlhe mo lefatsheng. Monna yo o botlhale go gaisa botlhe mo lefatsheng e ne e le Solomone, mme o ne a re,

*"Ke ne ka ineela ka pelo yotlhe go itse, le go batla, le go batla botlhale, le go thaloganya mabaka a dilo, le go itse boikepo jwa boeleele, le boeleele le botsenwa;*

*Mme ke fitlhetse MOSADI YO O BOTLHOKO BOGOLO GO LOSO, yo pelo ya gagwe e leng dirai le letloa, le diatla tsa gagwe di leng dikgole. Yo Modimo o mo itumelelang o tla falola mo go ene, mme moleofi o tla tshwarwa ke ene.*

*Bonang, se ke se fitlhetse, go bua morere, a bala ka bongwe gore a tle a itse pego;*

*Se mowa wa me o sa ntseng o se batla, mme ga ke ise ke se bone; ke bonye monna ale mongwefela magareng ga ba le diketse; mme mo go bao botlhe, yo e leng mosadi ene tota, ga ke ise ke mmone."*

Moreri 7:25-28.

Paulo o ne a re,

*"Ga ke letlelele mosadi go ruta kgotsa go TSAYA TAOLO."*

Go tloga kwa Tshimong ya Edene go ya pele, mosadi o ne a nna a leka go laola monna ka katlego, mme gompiano ke lefatsho la basadi mme modimo wa sesadi wa Amerika ke mosadi yo o sa aparang. Fela jaaka modingwana wa sesadi o o neng o wa go tswa kwa legodimong (gakologelwa gore matsogo a gagwe e ne e le a tshipi) o ne o tshwantsha paka ya ntlha kana Paka ya Baefeso, ka jalo thata ya gagwe e ile ya gola go fitlha a nna le taolo e e feletseng, mme taolo eo e ne diragadiwa ka puso ya gagwe ya boikutlo ja tshipi.

Jaanong mosadi ga a bopelwa go nna le boikutlo jwa tshipi. Go ya ka Dikwalo tse di Boitshepo, mosadi o tshwanetse go ikobela monna wa gagwe. Ke se a se laetsweng. Mosadi yo tota e leng wa sesadi, wa sesadi fela, o tla nna le boikutlo joo. Eseng mpopi wa selaka. Ga go na monna wa mmatota yo o dirang gore mosadi e nne mpopi wa selaka. Le fa go ntse jalo, o tla batla go nna ka fa tlase a bo a ikobela taolo mme a se ka a laola monna, ka gonne ke ene tlhogo ya lelapa. Fa a ka tola a senya setshwantsho se Modimo a se mo diretseng sone, o ka sokama. Monna mongwe le mongwe yo o letlang mosadi wa gagwe gore amo laole le ene o sentse setshwantsho seo mme o a sokama. Ke gone ka moo mosadi A SA TSHWANELANG GO APARA SE E LENG SA MONNA KGOTSA GO BEOLA MORIRI WA GAGWE. Ga a tshwanela go apara diaparo tsa monna kana go ipeola moriri. Fa a dira jalo o tsenelela mo lefelong la banna a bo a tsaya taolo ya bone a bo a itshenya. Mme fa mosadi a tsena mo seraleng se MODIMO A LAOTSENG GORE A SEKA A SE DIRA, o bontsha moya o a nang le one. Go nna mosadi yo o nang le taolo ke go nna moganetsakeresete mme peo ya Kereke ya Roma ya Katoliki e mo go ene le fa a ka nna a gana se ka bogale. Mme fa GO TLA MO LEFOKONG, a Modimo a fitlhelwe a le boammaaruri mme lefoko lengwe le lengwe la motho e le maaka Amen.

Mma re boele kwa tshimologong. Mo popong ya kwa tshimologong ya dilo tse re di bonang gompiano, Modimo o ne a dira sengwe le sengwe ka bobedi, tonanyana le namagadi. Go ne go na le dikoko tse pedi —mokoko le koko. Go ne go na le dikgomo tse pedi, kgomo le poo. Mme go tsamaya fela ka kwa tlase le tsone jalo. Mme fa go tla mo mothong, go ne go na le a le mongwe fela. Ba ne ba sa nyalana. Adame o ne a bopilwe mo setshwanong sa Modimo. E ne e le morwa Modimo. E re ka e ne e le morwa Modimo, o ne a ka se raelesege le go wa. Seo se ka se kgonege. Ka jalo Modimo o ne a tsaya karolo ya monna go dira gore batho ba wele mo boleong. Mosadi ga a ise a ko a tswe mo seatleng sa Modimo e le selo sa mmatota se Modimo a se dirileng. O ne a diriwa a tswa mo monneng. Mme fa Modimo a ne a mo ntsha mo monneng o ne a farologane thata le manamagadi a mangwe a a bopileng. O ne a kgona go raelesega. Ga go na namagadi epe e e bopilweng ke Modimo e e senang boitshwaro jo bo sa siamang ja tlhakanelo dikobo; mme namagadi ya setho o kgona go tlhakanela dikobo nako nngwe le nngwe.

Mme bokoa joo mo go ene bo ne jwa letla Satane gore a mo raele ka noga, mme seo se ne sa dira gore mosadi yo a nne mo boemong jo bo sa tlwaelegang fa pele ga Modimo le Lefoko la Gagwe. Ka fa letlhakoreng le lengwe ke mofuta wa dilo tsotlhe tse di maswe, tse di maswe le tse di makgapha, mme ka fa letlhakoreng le lengwe ke mofuta wa dilo tsotlhe tse di phepa le tse dintle, le tse di boitshepo jaaka setshelo sa Moya le masego a Modimo. Kafa letlhakoreng le lengwe o bidiwa seaka se se tagilweng ke

mofine ya kgokafalo ya sone. Mo letlhakoreng le lengwe o bidiwa Monyadiwa wa ga Keresete. Ka fa letlhakoreng le lengwe o bidiwa Sephiri sa Babelona, selo se se makgapha fa pele ga Modimo; mme ka fa letlhakoreng le lengwe o bidiwa Jerusalema yo Mosha, mmaarona. Ka fa letlhakoreng le lengwe, o leswe thata e bile o boikepo mo a latlhelwang mo bodibeng jwa molelo jaaka lefelo le le tshwanetseng fela; mme ka fa letlhakoreng le lengwe o tthatlosediwa kwa legodimong, a nna mo setulong sa Modimo sa bogosi jaaka lefelo le le tshwanelang fela kgosigadi e e ntseng jalo.

Mme mo motlheng ono wa Kereke ya Thiatira ke MOSADI YO O LAOLANG. Ke Masaitsiweng a Babelone. Ke seaka se segolo. Ke moporofeti wa mosadi wa maaka e bong Jesebele. KE KA NTLHA YA ENG? Ka gone mosadi wa boammaaruri o ikobela Modimo. Keresete ke tlhogo ya gagwe. Ga a na lefoko fa e se la Gagwe, ga a na dikakanyo fa e se tsa Gagwe, ga a na boeteledipele fa e se jwa Gagwe. Mme ga tweng ka kereke eno? O latlhile Lefoko, a senya Dibaebele le mekwalo e e molemo ya batho ba ba ratang Modimo. O bolaile batho ba ba neng ba rera boammaaruri. O thankgotse dikgosi, dikgosana le ditšhaba— o laola mephato mme o gatelela gore ke ene mmele wa ga Keresete wa boammaaruri le gore bomopapa ba gagwe ke bone ba ba emeng boemong ja ga Keresete. Diabolo o mo raela ka botlalo go fitlha le ene a raela ba bangwe. Ke monyadiwa wa ga Satane mme o ungwile ditumedi tsa bana ba bogokagadi.

O ne a tsere taolo ka nako yotlhe ya Dipaka tsa Lefifi. One a gapa gape a senya ka lobaka la dingwaga tse di fetang makgolo a le borobabongwe. O ne a fedisa botaki, a senya boitsaanape, a se ka a tlhola sepe fa e se loso go fitlha lesedi la Boammaaruri le nyelela gotlhelele mme go sala fela lesedi le lennye fela. Oli le mofine di ne di kgadile di sa tlhole di elela; mme lefa taolo ene ele ya magosi a lefatshe mme a batla gore batho botlhe ba age mo go ene, go ne go na le sethopho se sennye se se neng se le sa Modimo mme se nna baagedi ba legodimo, mme o ne a sa kgone go se senya. Modimo o ne a sireletsa letsomanyane la Gagwe; le ne le ka se sengwe. Kereke eno ya Roma e ne e le ya boheitane e bile e le boikepo fela jaaka Kgosigadi Athalia yo o neng a leka go senya losika lotlhe lwa segosi mme a batla a atlega, mme MODIMO O NE A Boloka NNGWE, mme go tswa mo go ene go ne ga nna le badumedi ba le bantsi. Ka jalo Modimo o ne a boloka letsomanyane mo bosigong joo jo bolelele jo bo lefifi mme go tswa mo boammaaruring jwa bone kgabagare ga tlhaga Luther.

Mongwe le mongwe yo o itseng sengwe ka Kereke ya Roma ya Katoliki le mofuta wa yone wa kobamelo a ka kgona go bona gore ke ka ntlha yang fa motse o wa Thiatira o ne wa tlhophiwa ke Moya go emela kereke mo Dipaka tsa Lefifi. Ke eo, fa pele ga matlho a rona.

### **Paka**

Motlha wa Thyatire e ne e le one o o tsereng lobaka lo loleele go di gaisa tsotlhe, dingwaga di ka nna 900, go tloga ka ngwaga wa 606 go fitlha ka ngwaga wa 1520.

### **Morongwa**

Kereke e ne e sa bolo go kgaogana ka ditlhopho tse pedi, ya Bophirima le ya Botlhaba. Gangwe le gape go ne go tlhagelela morulaganyi wa diphetogo mo kgaolong nngwe kana mo go tsoo bobedi mme ka lobakanyana a etelelepele lekgamu le lenngwe la kereke gore le nne le kamano le botsalano jo bo boteng go nna gaufi le Modimo. Kwa Bophirima go ne go na le monna wa go nna jalo a bidiwa Francis wa kwa Assisi. Tiro ya gagwe e ne ya atlega ka lobakanyana, mme kgabagare babusi ba Roma ba ne ba e thibela. Monna yo o neng a bidiwa Peter Waldo wa kwa Lyons, yo e neng e le mogwebi yo o neng a tlogela botshelo jwa gagwe jwa lefatshe, o ne a nna matlhagatlhaga thata mo go direleng Morena mme a gogela ba le bantsi mo go Ene; mme o ne a kgorelediwa mo tirong ya gagwe mme a kgaolwa ke mopapa. Fa go sekasekiwa ka tshedimose tso ya Lefoko, go ne go sena ope gotswa mo ditlhopheng tsa Bophirima kana Botlhaba yo o neng a ka nna morongwa wa paka e. Lefa go ntse jalo, go ne go na le banna ba babedi kwa Ditlhaketlhakeng tsa Boritane bao bodiredi jwa bone ka Lefoko le ka tiro bo neng bo ka emelelana le teko. Bone e ne e le Moitshepi Patrick le Moitshepi Columba. E ne e le mo go Moitshepi Columba yo o neng a nna morongwa.

Le fa gone morongwa wa Motlha wa Thyatire e ne e le Moitshepi Columba, ke batla go sedimosa go sekae mo botshelong jwa ga Moitshepi Patrick jaaka sekae mo go rona mme gape le go nyatsa se Roma e neng e se bolela gore Moitshepi Patrick e ne e le mongwe wa bone go feta jaaka Joan of Arc. Patrick o ne tsetswe ke kgaitadie St. Martin kwa toropong e potlana e e bidiwang Bonavern e e mo lotshitshing la noka ya Clyde.

Letsatsi lengwe fa a ne a tshameka le bokgaitadie ba babedi mo lotshitshing, go ne ga tla dinokwane tsa lewatle mme tsa ba tsaya botlhe ba le bararo. Ga go na ope yo o itseng gore bokgaitadia Patrick ba ne ba ya kae, mme Patrick (yo leina la gagwe e neng e le Succat) o ne a rekisediwa kgosi nngwe kwa Bokone ja Ireland. Tiro ya gagwe e ne e le go tlhokomela dikolobe. O ne a katisa dintša go dira se. Dintša tsa gagwe di ne di katisitswe sentle mo e leng gore dine di tlelwa ke batho ba ba tswang kgakala go tla go di reka. Mo bodutung ja gagwe o ne a retologela kwa Modimong mme a bolokwa.

Go tswa foo o ne a telwa ke keletso ya go ngwega gore a a boele gagabo ko batsading ba gagwe. O ne a dira leano le le neng la dira gore bokgoni jwa gagwe jwa go katisa bo nne le mosola thata. O ne a ruta dintša go rapama mo go ene le go bipa mmele wa gagwe ka kelotlhoko le gore di se ka tsa tsamaya go fitlha a di laela. Ka jalo letsatsi lengwe fa mong wa gagwe a ne a rekisa dintša di le mmalwa, Patrick o ne a laela dintša tsotlhe, kwantle ga e e neng e le yone e e neg e eteletse motlhape, gore di tsene mo mokorong. E e neng e le yone e eteletse pe le motlhape e a neng a e fa sekao sa sephiri e ne ya sia mme ya gana go palama mokoro. Fa morena wa gagwe le moreki ba santse ba leka go tshwara ntša, Patrick o ne a tsena mo mokorong mme a laela dintša gore di bipe mmele wa gagwe go mo sireletse gore a seka a bonala. Go tswa foo o ne a letsa molodi a bo a bitsa ntsa e e neng e eteletse motlhape go tsena mo mokorong gore e mo palame godimo. E re ka Patrick a ne a sa bonale gope, moreki o ne a simolola go tsamaisa sekepe mme a tsamaya.

Fa a sena go tshomamisa gore kapotene o ne a le kgakala thata gore a ka boa, Patrick o ne a naya dintša letshwao le lengwe le le neng la dira gore di tsose khuduego. Go tswa foo o ne a tswa mme a bolelela kapotene gore fa a sa mo ise kwa lotshitshing la kwa legaeng la gagwe o tla laela dintša gore di tswelele ka go tsosa khuduego di bogola, mme o tla tsaya marapo a sekepe.

Lefa go ntse jalo, kapotene e ne e le Mokeresete, mme fa a utlwa kgang ya mosimane yono o ne a mo isa kwa legaeng la gagwe ka boitumelo. Patrick o ne a tsena sekolo sa Baebele koo mme a boela kwa Ireland koo ka Lefoko la Modimo le ka maatla a Modimo a a neng a dira ditshupo le dikgakgamatso di le dintsi a neng a gapa diketekete tsa batho go tla ko Moreneng. Ga a ise a ko a ye kwa Roma ka nako epe e bile ga a ise a ko a romelwe ke Roma ka nako epe. Boammaaruri ke gore e rile fa Baroma ba goroga gape ba kgona go nna le taolo ya setlhaketlhake se, gape e rile fa ba lemoga gore ba ne ba tsile ka nako e e siameng, bana le tshono, ba ne ba bolaya Bakeresete ba ba fetang 100 000, bao ba ba neng ba tswa mo setlhopheng se se neng sa sale se ntse se gola se se neng se tswa mo go sa kwa tshimologong se se neng sa tla kwa Moreneng se se neng se obametswe ke Moitshepi Patrick.

Dingwaga di ka nna 60 morago ga loso lwa ga Moitshepi Patrick, gone ga tsholwa Columba kwa lefelo le le bidiwang County Donegal, kwa Bokone ja Ireland, mo lelapeng la segosi la ga Fergus. O ne a nna mohanoki yo o botlhale thata, yo o ineetseng, a tshwere bontsi jwa Dikwalo tsa Lefoko ka tlhogo. Modimo o ne a mmitsa ka lentswe le le utlwalang gore e nne morongwa. Fa a sena go utlwa lentswe la Modimo, gone go sena sepe se se neng se ka mo thibela, mme bodiredi jwa gagwe jwa dikgakgamatso bo dirile gore bakwala ditso ba le bantsi ba mo mo mme mo maemong a baaposetoloi. Bodiredi jwa gagwe bo ne bo le bogolo thata ka ditshupo tse di fetang tsa tlholego tse di neng tsa latela mo e leng gore bangwe (segolobogolo baithuti kwa Roma) ba ne ba akanya gore dipego tseno di feteleditswe.

Mo loetong longwe la gagwe la borongwa, fa a ne a atamela motse o o ageletsweng ka mabota, o ne a fitlhela dikgoro tsa one di lotletswe. O ne a rapelela kwa godimo gore Modimo a tsenelele mme a mo letle gore a ye kwa bathong gore a ye go rera. Mme fa a ntse a rapela, baloi ba ntlo ya segosi ba ne ba simolola go mo tshwenya ka go mo tsoetsa medumo. A bo a simolola go opela pesalema. Fa a ntse a tsweletse a opela, Modimo o ne a godisa lentswe la gagwe mo a neng a didimatsa selelo sa baheitane. Ka tshoganyetso fela dikgoro di ne tsa bulega. Mme a tsena a rera Efangele, a gapela ba bantsi go ya ko mo Moreneng.

Mo lekgetlhong le lengwe fa le ene a ne a thibetswe go tsena mo motseng, fa a ne a tswa a ya go tsamaya, morwa wa moeteledipele o ne a lwala thata ka tshoganyetso, tota le go fitlha ko losong. Moitshepi Columba o ne a batliwa ka bonako mme a bitswa gore a boe. Fa a rapela thapelo ya tumelo, mosimane o ne a fola ka yone nako eo. Morago ga moo, go nega letelelwa Efangele gore e rerwe mo motseng o.

Efangele e e itshekileng e e neng ya rerwa ke Columba le badiramongo le ene e ne ya anama go ralala Scotland yotlhe, ya e lebisa kwa Modimong. Gape e ne ya elela kwa Ireland le kwa Bokone ja Yuropa. Tsela e a neng a anamisa Efangele ka yone e ne e le gore gongwe batho ba le lesome le bobedi ba eteletse pele ke moeteledipele mongwe ba tla bo ba ya kwa lefelong le lesa mme ba age— motse o o neng o remeletse mo Efangeleng. Gareng ga banna bano ba ba lesome le bobedi go ne go tla nna le babetli, barutisi, bareri, jalo le jalo, botlhe ba itse Lefoko le go tshela ka tsela e e boitshepo. Kolone e e nnye e ne e sireleditswe ke lebota. Go ise go ye kae lefelo leno le ne la dikaganyediwa ke baithuti le malapa a bone mo magaeng a bone, ba ithuta Lefoko e bile ba ipaakanyetsa go ya go direla Morena jaaka barongwa, baeteledipele le bareri. Banna ba ne ba gololesegile go nyala le mororo ba le bantsi ba ne ba sa dire jalo, gore ba direle Modimo botoka. Ba ne ba sa tlhoke go thusiwa ke puso, ka jalo ba ne ba sa nne le seabe mo dipolotiking. Go na le gore ba tlhasele madumedi a mangwe ba ne ba ruta boammaaruri ka gonne ba ne ba dumela gore boammaaruri ke sebetsa se se lekaneng go diragatsa maikaelelo a Modimo a neng a a ikaeletse ka bone. Ba ne ba ikemetse gotlhelele mo go Roma.

Moitshepi Columba e ne e le ene mosimolodi wa sekolo se segolo sa Baebele mo setlhaketlhakeng se se bidiwang Hy (kwa lotshitshing la Scotland le le kwa borwabophirima). Fa a goroga koo, setlhaketlhake seo se ne se le kgakalakakala e bile se le mafika mo e leng gore se ne se sa kgone go ba naya dijo tse

di lekaneng. Mme Columba o ne a jala peo ka seatla se sengwe ka fa a ntse a tsholeditse se sengwe a rapela. Gompieno setlhaketlhake seno ke sengwe sa tse di nang le mmu o o nonneng thata mo lefatsheng. Go ne ga tswa bakanoki ba ba maatla ba ba neng ba na le bothlale le maatla a Modimo mo setlhaketlhakeng seo se se neng se theilwe gape se ikaegile ka Baebele.

Fa ke ne ke bala mo ditsong tsa motlhanka yo yo mogolo wa Modimo le tiro e e gakgamatsang e a neng a e dira, ke ne ka utlwa bothlako thata fa ke lemoga gore puso ya mopapa, e e neng e eletsa go laola batho bothle, e ne ya tla mme kgabagare ya leswafatsa mafelo a a borongwa mme ya senya boammaaruri jo bo neng bo rutiwa ke Columba.

### Di Tumediso

Tshenolo 2:18,

*"Dilo tse di buiwa ke Morwa Modimo, Yo matlho a gagwe a ntseng jaaka kgabo ya molelo, le dinao tsa gagwe di ntseng jaaka kgotlho."*

Go senolwa ga Bomodimo mo pakeng ya Thiatira ke gore Jesu ke Morwa Modimo. Fa a ne a le mo nameng nako nngwe o ne a bidiwa Morwa Motho. Mme go tloga jaanong ga re tlhole re mo itse ka nama Ga e tlhole e le Morwa Motho, Moperofeti yo Mogolo, Yo mo go e ne go neng go na le diporofeso tsotlhe. Morwa yo o Tsetsweng a le Esi o boetse mo sehubeng sa ga Rara. Jaanong re mo itse ka maatla a tsogo. O tsositswe mme o tsere maatla a gagwe a magolo mme o kwa godimo ga dilo tsotlhe le mo go tsotlhe go baka kgalalelo ya gagwe. Ga a kitla a tlhakanela kgalalelo ya gagwe le ope. Ga a kitla a neela opefela boeteledipele jwa gagwe mo kerekeng.

O lebelela ko tlase kwa Thiatira, mme fao o bona toropo eo le mo pakeng eo ya bone tlotlo e e lebaneng Ene Ale nosi, e newa motho yo mongwe. Matlho a gagwe a tuka ka molelo wa bogale le katlholo fa a bona Apolose a tlotliwa jaaka Morwa Modimo, fa e le ene fela Morwa yo o Tsetsweng a le nosi wa ga Rara. Abo katlholo ya Gagwe e tshwanetse ya bo e ne e le maswe jang ne mo bodumeding jwa paka ya Thiatira ko maloko a kereke jaaka baobamedi ba baheitane ba morwa modimo (e bong Apolo morwa Seuse), ba neng ba godisetsa mmusi wa motho mo kobamelong, ba enngwe nokeng ke thata ya puso. Gonne ke sone se a neng a se bona. Kereke ya Katoliki ya Roma, e e neng e ineetse ka botlalo mo kobamelong ya medingwana e e neng e theilwe mo ditirelong tsa modimo wa letsatsi (yo oneng a bidiwa Apollo) e ne e godisitse motho go nna modimo wa mmatota (mopapa) ka go nyalana ga kereke le puso. Ka gonne Thomas Aquinas le Alverus Pelagius ba ne ba thalosa ba bo ba bolela gore: "Mopapa o bonala e se motho mme ke Modimo mo bathong ba ba mo lebang ka tsela ya semoya. Taolo ya gagwe ga e na tekanyetso. A ka bolela gore se a se batlang se siame mme a ka tseela mongwe le mongwe ditshwanelo tsa gagwe jaaka a bona go tshwanela. Go belaela maatla a mopapa a nang le one mo lebopong lotlhe go ka felela go dira gore motho a se ka a bolokwa. Baba ba bagolo ba kereke ke baingaudi ba ba sa batleng go rwala jokwe ya kutlo ya boammaaruri.."

*"Go na le motshereganyi a le mongwe fela fa gare ga Modimo le batho, yo e leng monna Keresete Jesu (Morwa Modimo)."*

I Timotheo 2:5.

Mme mopapa wa Roma o fetotse Lefoko. O ne a e dira jalo, "motshereganyi a le mongwe fa gare ga Modimo le motho (e seng batho)." Ka jalo jaanong o tshereganya fa gare ga motshereganyi le batho. Mme ga go na motshereganyi ope fa e se Morwa. Mopapa o bolela gore batho ba tla bolokwa ka kereke ya Roma. Mme ga go na poloko fa e se ka Morwa Modimo. Ga go gakgamatse go bo matlho a gagwe a tuka katshakgalo ya katlholo. Ga go gakgamatse go bo dinao tsa gagwe di tshwana le kgotlho e e borethe fa a eme a ipaakanyeditse go sila gonna boupi magosi a a boikepo a lefatshe leno. Re leboga Modimo ka ntlha ya maoto ao a a nonofileng a kgotlho. Bare ntsheditse katlholo. Jaanong ke motheo wa rona gonne se eleng pelo ya Gagwe ke sa rona. Re ema re bonafadiwa mo go Ene, Jesu Morwa Modimo.

E ne e le mo pakeng e re bonang go tthagoga ga ga Bo-Mohammete ba ba neng ba gana Morwa Modimo mme ba dira gore bothle ba ba ipitsang Bakeresete ba swe.

Gape e ne e le mo pakeng e fa kereke ya maaka e ne ya gana taelo ya ntlha ya Modimo Mothatayotlhe mme e ne ya simolola go tloa taelo ya bobedi ka bonako ka gonne e ne ya baya mopapa wa yone mo boemong jwa ga Jesu Keresete mme ya tlhoma le go pateletsa kobamelo ya medimo ya disetwa mo e leng gore go ne go raya loso mo go bao ba ba neng ba gana go letla ditshwantsho gore di se ka tsa tsena mo kerekeng. Ka nako ya puso ya Mmusimogolo Theodora fela, go tloga ka ngwaga wa 842 go ya kwa ngwageng wa 867, go ne ga bolawa baitshepi ba feta 100 000 ka gonne ba ne ba tsaya gore ditshwantsho ga di na mosola.

E le ruri paka e e tshwanetse gore e ikwatlhaye kana e latlhegelwe ke sengwe le sengwe. Foo go eme Morena wa kgalalelo, Modimo ka boene Modimo—Lefoko la Gagwe le kgaphetswe kwa tlhoko, motho wa Gagwe o ganne, mme diatla tsa setho le dipelo tsa batho ga di kake tsa mo fenywa. Le fa ba ka mo

itatola, o nna a ikanyega. "Se boifeng, letsomanenyana; gonne go natefetse Rraeno go lo naya puso. Mme fa ke tla ka dinao tsa kgotlho le matlho a molelo, ke tla duela; katlholo ke ya me, ke tla duela," go bua Morena.

### **Kgalaletso ya Tlotla**

Tshenolo 2:19,

*Ke a di itse ditiro tsa gago, le lerato la gago, le tirelo, le tumelo, le bopelotelele, le gore ditiro tsa gago; mme tsa bofelo go bo dile dintsi gona le tsa ntlha."*

Le fa gape re fitlhela mafoko a a tshwanang a a simololang, "Ke itse ditiro tsa gago". Morwa Modimo ka boEne o ne a re, "Dumelang mo go nna ka ntlha ya ditiro tsa me". O ne A gatelela ditiro tsa Gagwe fa A ne A le mo lefatsheng. Ditiro tse a neng a di dira di ne di laetswe ke Modimo gore di rotloetse tumelo mo go Ene. E ne e le karolo e kgolo ya bodiredi jwa Gagwe.

Mowa wa Gagwe o o Boitshepo o ne wa bua jaana ka moaposetoloi Paulo,

*"Gonne re tiro ya one, re bopetswe ditiro tse di molemo mo go Keresete Jesu, tse Modimo o di baakanyeditseng pele gore re tsamae mo go tsone."*

Baefeso 2:10.

Ditiro tseno di ne di tshwanetse go tlotlheletsa tumelo mo go Ene ka gonne di ne di tla bontsha kamano eo le Ene eo Paulo a neng a e tshalosa jaaka e e "bopilweng mo go Ene".

Jaanong ditiro ga di kitla di tsaya boemo ja go dumela mo Modimong gore re bolokwe. Mme ditiro tsa rona di tla bontsha tumelo e re setseng re na nayo mo go Ene. Ditiro tse di molemo ga di kitla di go boloka, mme di tla tswa mo botshelong jo o bo bolokileng e le maungo mo Moreneng. Ke dumela mo ditirong tse di molemo. Tota le fa motho a sa boloka, o tshwanetse go dira ditiro tse di molemo le go dira ka bojotlhe ja gagwe go dira se a ka se kgonang. Se se makgapha mo matlhong a Modimo ke gore batho ba dire ditiro tse di bosula mme ba bo ba re ba dira thato ya Morena. Ke se bobishopo le bomopapa le baetedipele ba kereke ya Roma ba neng ba se dira. Ba ne ba bolaya, ba gobatsa le go dira bosula ja mefuta yotlhe ka Leina la Morena. Ba ne ba tshela botshelo jo bo farologaneng gotlhelele le se Lefoko le se rutang. Mo letsatsing leo le le bosula badumedi bao ba boammaaruri ba ne ba phatsima jaaka lesedi mo lefelong le le lefifi fa ba ntse ba dira molemo ka metlha; ka gonne ba ne ba busetsa phutso ka tshegofatso, mme ba ne ba dira boammaaruri gore ba galeletse Modimo le mororo ba le bantsi ba ne ba swela mo go jone.

Mo temaneng e O akgola bana ba Gagwe ka gonne ba ne ba tshela matshelo a a fetogileng. Ditiro tsa bone di ne di supa gore go ne go na le Mowa o mosha mo teng ga bone. Batho ba ne ba bona ditiro tsa bone tse di molemo mme ba galeletsa Modimo. Ee, fa e le gore o Mokeresete o tla dira se se siameng. Ditiro tsa gago di tla bontsha gore pelo ya gago e siame. Mme ga e kitla e nna sengwe sa go iketsisa, ka gonne o tla dira thato ya Gagwe fa go se na ope fa e se Modimo fela yo o go bonang, mme o tla dira thato ya Gagwe le fa e ka go tlhoka botshelo.

*"Ke itse ditiro tsa gago, le lorato la gago, le tirelo ya gago, le tumelo, le boitshoko ja gago.."* O tla lemoga gore lerato la bone lo beilwe fa gare ga 'ditiro' le 'tirelo' Mme ke lone lefelo le le tshwanetseng la go dira jalo, ka gonne kwantle ga lorato ditiro tsa rona ga di amogelesenge fa pele ga Modimo mme le tirelo ya rona ga e amogelesenge. Fa Paulo a ne a bua le Bakorintha o ne a re: "Fa ke se na lorato, ga ke sepe, mme ga ke solegelwe molemo ke sepe fa ke sa dire ka lorato." Jaanong o kgona go bona fano gore badumedi bano ba ne ba se mo setlhopheng seo sa Banikolaite ba ba neng ba dira ditiro e le tsela ya go bolokwa kana go kgatlhwa ke bathon. Ba ne ba dira ditiro tsa bone ka ntlha ya lerato la Modimo le le neng la tshololelwa mo dipelong tsa bone ke Moya o o Boitshepo. Lorato le ba neng ba na le lone mo dipelong tsa bone e ne e le lerato le Modimo a ratang batho ba Gagwe ka lone. Jesu o ne a re, "Ka se batho botlhe ba tla itse fa le le barutwa BAME, fa le ratana." Baheitane ba ba neng ba bona botshelo jwa Bakeresete ba bogologolo ba ne ba re, "Bonang kafa ba ratanang ka teng". John o ne a re

*"Mongwe le mongwe yo o ratang o tsetswe ke Modimo."*

Johane 4:7.

Ke batla go go tlhagisa fano. E bolela gore mo metlheng ya bofelo lerato la ba le bantsi le tla tsidifala ka ntlha ya go oketsega ga boikepo. Mo motlheng wa Laodikia, kana wa bofelo, go ithata le go rata dilo tse di bonalang go tla emisetsa go rata Modimo ka tsela ya mmatota. Re tshwanetse go itisa kgatlhanong le maatla a bolelo mo metlheng eno ya bofelo. Batho ba le bantsi ba thatafalelwa ke go dira jalo ka gonne ga ba lemoge gore moya o wa malatsi a bofelo o ama batho jang. Ke nako ya gore re atamalane le Modimo mme re mo letle gore a tlatse matshelo a rona ka lerato la Gagwe, kana re tla utlwa serame sa kereke ya malatsi a bofelo, mme re gane boammaaruri ja Modimo jo e leng jone fela bo

ka re thusang.

Mo dingwageng tseo tse di lefifi le tse di boifisang mofine wa boammaaruri o ne wa boloka lerato la one mo Modimong le mo bakaulengweng. Modimo o ne a ba akgolela seo.

*"Ke itse tirelo ya lona."* Jesu o ne a re, "Yo mogolo mo go botlhe ke yo eleng motlhanka wa botlhe." Monna mongwe yo o botlhale o ne a akgelela ka seane seo. O ne a bua jaana: "Ke ditso fela tse di tla bontshang gore mafoko ao a boammaaruri." Monna yoo o ne a nepile. Banna botlhe ba ba tumileng ba ditso e ne e le batlhanka. Ba ba neng ba batla go direlwa, ba ba neng ba gatelela, ba ba neng ba batla go nna kwa pele ka metlha, ba ne ba tlhabiwa ke ditlhong. Tota le batho ba ba humileng thata Modimo o a ba kgala fa ba sa dirise dikhumo tsa bone sentle. Mme fa o ka leba mo ditsong o tla fitlhela gore ba ba neng ba direla ba bangwe ke bone ba ba neng ba le bagolo tota. Ditso ga di kitla di galaletsa batho ba ba neng ba direla ba bangwe dilo tse dintsi, mme e tla galaletsa ba ba neng ba direla ba bangwe dilo tse dintsi.

Jaanong a re diriseng seo mo go rona. Fela jaaka Morwa Motho a sa tla go direlwa, mme a tllile go direla, re tshwanetse go latela sekao seo. Mo lebeleleng jaaka fa a ikoba fa pele ga dinao tsa baaposetoloi mme a ba tlhapisana dinao tse di lapileng le tse di leswe. Jesu a mo fetola a re, "Se ke se dirang wena ga o se tlhaloganye jaanong, mme o tla se lemoga morago". Mme se le mponang ke se dira, le lona le tshwanetse go se dira." O ne a nna motlhanka gore Modimo a tle a mo godise go ya kwa bogodimong jo bo kwa godimo. Mme ka letsatsi lengwe mo katlholong ya baitshepi re tllile go mo utlwa a re, "Tsena amogelesega mo boipelong ja Morena, O dirile sentle, MOTLHANKA yo o molemo yo o ikanyegang." Go thata go nna motlhanka ka nako tsotle. Mme ba ba ntshang moneelo e bile ba ntshiwa moneelo ba tla nna le Ene mo setulong sa gagwe sa bogosi. Go tla bo go na le mosola. "A re direleng Morena, go tswa mo mosong go fitlha letsatsi le phirima, a re bue ka lorato lwa gagwe le tlhokomelo ya gagwe e e gakgamatsang, mme fa botshelo jotlhe bo fela mme tiro ya rona mo lefatsheng e weditswe, mme go bidiwa lokwalo ke tla bo ke le teng."

*"Ke itse tumelo ya gago."* Jaanong ga fa ga abue jaaka a ne a bua le phuthego ya kwa Peregamo, "lo tshwere tumelo YAME". Ga a bue ka tumelo ya Gagwe jaanong, mme o ba akgolela ka ntlha ya boikanyegi ja bone. Mme fa a ntse a dira jalo o umaka le 'bopelotelele' ja bone. Gone jaanong boikanyegi le bopelotelele di a tsamaisana.

Tota e bile, bopelotelele ke maduo a boikanyegi, ka gonne Jakobe 1:3 ya re,

*"Go lekwa ga tumelo ya lona go dira gore lo nne pelotelele."*

Ga go na tsela epe e nngwe ya go nna pelotelele. E tshwanetse ya tla ka go lekwa ga tumelo ya rona.

Baroma 5:3,

*"Pitlagano e dira gore motho a nne pelotelele."*

Tsela e Modimo a tsayang go bontsha bopelotelele ja rona ka yone go le botlhokwa thata e bonala mo go Jakobe 1:4,

*"Mme a boitshoko bo fetse tiro ya jone, gore le nne botlalo, le itekanele, le se tlhaele mo go sepe."*

Thato ya Modimo mo go rona ke go nna re Itekanetse. Mme boitekanelo joo ke go nna pelotelele—go leta mo Modimong le go letela Modimo. E ke tsela e botho ja motho bo golang ka yone. A bo Modimo a ile a akgolela baitshepi ba ba Dipaka tsa Lefifi jang ne! Ba ne ba le pelotelele jaaka dikoanyana tse di neng di isiwa kwa sebolaelong, ba direla Modimo ka lerato le ka boikanyegi. NS Seo ke sone fela se ba neng ba se batla mo botshelong, go direla Morena wa bone. A bo tuelo ya bone e ne e le kgolo jang ne!

*"Ke itse ditiro tsa gago; mme tsa morago di gaisa tsa pele.."*

Ruri seo se a gakgamatsa. Fa lefifi la paka e le ntse le oketsega; fa buka e e kwadileng maina a a bao ba ba neng e le balwela tumelo ba ba nenbg ba bolawa a oketsega letsatsi le letsatsi, ba ne ba bereka thata, ba ne ba direla botlhe thata, mme tumelo ya bone e ne ya oketsega. A bo go ne go utlwisana botlhoko jang ne go bo lerato le ile la fokotsega mo pakeng ya Baefeso! Mme tota ga go buiwe sepe ka tiro e e oketsegileng ya lerato e ba neng ba e dira mo dipakeng tse dingwe; mme mo pakeng e, mo pakeng e e lefifi go gaisa dipaka tsotlhe, ba ne ba Mo direla le go feta. A thuto e e molemo ruri! Ga gona go go kutla ga tirelo eno e e molemo ya go rata Morena ga e ke e khutla, go na le moo e a oketsega. Se ke sone sephiri. A mmaba a leke go kgoreletsa tirelo ya rona mo Moreneng—mme re tla mo araba ka go oketsa tirelo ya rona. Fa batho ba ba bokoa ba goa ka ntlha ya poifo, ke nako ya go goa ka phenyo.

*"Ke itse ditiro tsa gago, mme tsa morago di gaisa tsa pele."*

Jaanong jaaka re setse re boletse, paka e e bidiwa Paka ya Lefifi ka gonne tota e ne e le nako e e lefifi thata mo ditsong tsotlhe. E ne e le ka paka wa ga Mopapa Innocent III yo o neng a ipolela gore ke ene "moemedi wa ga Keresete —mmusi yo mogolo mo kerekeng le mo lefatsheng", yo o neng a tlhoma KGOTLATSHEKELO e e Kgatlhonong le Boingaudi e e neng ya tsholola madi a mantshi go feta ka nako epe fela e nngwe kwantle ga ya Diphetogo. E ne e le paka ya puso e e neng e letelela bogokagadi, nako ya fa diaka dine di busa. Sagarius III o ne a na le mosadi yo a neng a ratana le ene mme o ne a "tlatsa khwaere ya mopapa ka baratani le barwa ba ba neng ba tshotswe kwantle ga lenyalo mme a fetola ntlo ya borena ya mopapa go nna legaga la dinokwane." Anastasius III o ne a bolawa ka go kgamiwa a hupediwa ke Marozia yo e neng e le moratiwa wa ga Sagarius. John XI e ne e le morwa wa ga Marozia yo o neng a se mo lenyalong. John XII e ne e le setlogolo sa ga Marozia mme o ne a betelela batlholagadi le makgarebane mme o ne a bolawa fa a ne a le mo tirong ya boaka le mosadi wa monna mongwe yo o neng a galefile thata mme a felela a mmolaile." E ne e le paka ya go Kgaogana ga Bomopapa ka gonne bapapa ba babedi (yo mongwe a busa a le kwa Avignon mme yo mongwe a le kwa Roma) ba ne ba rogana gape ba lwantshana. Bomopapa ba ba ne ba se molato fela wa go tlhakanela dikobo ka tsela e e sa siamang (go nna le bana ba le bantsi ba ba seng mo lenyalong, go tlhakanela dikobo le bong jo bo tshwanang jalo le jalo) mme gape ba ne ba le molato wa go rekisa ditiro tsa boperesiti mo bathong ba ba neng ba ntsha tlhwatlhwa e e kwa godimo thata.

E ne e le paka e mo go yone lesedi le neng le phatsima ka tsela e e bokoa, lefa go ntse jalo badumedi ba sekae ba ne ba dira ka tlhoafalo fa lefifi le ntse le oketsega go fitlha go ela kwa bokhutlong ja paka e go ne ga tsoga ba le bantsi ba leka go dira diphetogo. Tiro ya bone e ne e le e e tlhoafetseng thata mo e leng gore e ne ya baakanyetsa diphetogo tse di neng di tla. Ke gone ka moo Lefoko le buang jaana ka paka eo, "Ditiro tsa gago tsa bofelo (bokhutlo jwa paka) di feta tsa pele".

Lefoko, Thiatira, le na le bokao jo bo farologaneng mo go bone se e leng "Tswelediso ya go fa setlhabelo ka nako tsotlhe". Batho ba le bantsi ba dumela gore se ke boporofeti jo bo maleba le go dirisiwa ga Mmisa o e leng go tswelwediso ya tshupo ya setlhabelo sa ga Keresete. Ke kgopolo e e molemo tota, mme gape e ka raya go intsha setlhabelo ka metlha mo matshelong le mo tirong ya badumedi ba boammaaruri ba Morena.

E le ruri baitshepi ba ba kwa Thiatira e ne e le maungo a ntlha a thobo, ba tletse ka Moya o o Boitshepo le tumelo, ba bopetswe ditiro tse di molemo, ba bontsha pako ya gagwe, ba sa rate matshelo a bone, mme ba itumelela go a ntshetsa Morena setlhabelo se se monate.

### Go Kgalemelwa

Tshenolo 2:20,

*Le fa go ntse jalo, ke na le go go nyatsa, ka ntlha ya gore o letlelela mosadi yoo, e bong Isebele, yo o ipitsang moporofeti, a ruta batlhanka ba me, a ba timetsa gore ba dire boaka, le go ja tse di ntsheditsweng setlhabelo medimo ya diseto."*

Jaanong ka temana e ke batla gore le boele kwa temaneng ya bo 23 mme le bone bosupi ja boammaaruri jo bogolo jo ke ntseng ke le e bolelela. "Mme ke tla bolaya bana ba gagwe bolaya ka lesu; mme diphuthego tsotlhe di tla itse gore ke Nna yo o tlhotlhomisang boeng ja dipelo." Ke ne ke ntse ke bua go tswa kwa tshimologong gore tota go na le diphuthego tse pedi, le mororo Moya o bua le tsone ka bobedi mo pakeng nngwe le nngwe, jaaka ekete di ne di le bongwe fela. Fa go bolelwa ka phepafalo gore go na le dikereke, mme go bolelwa ka phepafalo fela jalo gore dingwe tsa dikereke tseo GA DI itse gore ke Ene yo o tlhatlhoang diphilo le dipelo.. O tsile go ba bontsha gore go ntse jalo. Jaanong, ke dife dikereke tse di sa itseng boammaaruri jono e tla nna dife? Ke boammaaruri gore ke setlhopha sa mofine wa maaka ka gonne badumedi ba boammaaruri ba itse gore katlholo e simolola mo ntlong ya Modimo, mme e re ka ba boifa Modimo, ba a ikatlhola gore ba se ka ba atlholwa.

Jaanong ke ka ntlha yang fa Modimo a bitsa dikereke tse a re ke tsa gagwe le mororo e le mofine wa maaka? Boammaaruri ke gore ke Bakeresete. Mme ga se Bakeresete ba Mowa. Ke Bakeresete ba ba senama. Ba dirisa Leina leo lefela. Mareko 7:7, "Le fa go ntse jalo ba nkobamelela lefela, ka gonne ba ruta ditaello tsa batho ba re ke dithuto tsa motheo." Mme tota ke Bakeresete ka gore ke e ng gape se ba ka se nna? Mo-Mohammeda ke Mo-Mohammeda. Ke bodumedi ja gagwe go sa kgathalesege gore o bo tshela jang ka gonne o dumalana le se Koran e se rutang.

Ka tsela e e tshwanang Mokeresete ke Mokeresete fa fela a dumela gore Jesu ke Morwa Modimo, o tshotswe ke lekgarebane, o ne a bapolwa a bo a swa a bo a tsoga gape, gore ke Mmoloki wa batho, jalo le jalo. (Tota e bile, mo Motlheng wa Laodikia go tla bo go na le ba ba ipitsang Bakeresete ka gonne ba amogela dinonofo tse di molemo tsa ga Jesu, fa ba ntse ba ipolokela tshwanelo ya go itatola Bomodimo jwa Gagwe. Borasaense ba Bakeresete ba setse ba dirile jalo mmogo le boidiidi jwa batho ba ba rerang Efangele e e amogegang mo setšhabeng). Ke Mokeresete ka leina mme ke leloko la kereke. Mme ga se modumedi wa BOAMMAARURI kana wa Semoya. Modumedi yo o ntseng jalo ke yo o kolobeditsweng mo mmeleng wa ga Keresete mme a nna tokololo ya gagwe. Le fa go ntse jalo, Modimo ke ene a laetseng



gore mefero e gole le korong mme ga e a tshwanela go kumolwa. Ke taelo ya Modimo. Letsatsi la bone la go kgobokangwa le go fisiwa le e tla; mme ga le ise le tle.

Ka jalo Moya o bua le setlhophha seno se se kopaneng. Ka fa letlhakoreng le lengwe o a baka, mme ka fa go le lengwe o a kgalemela O buile se se siameng ka modumedi wa boammaaruri. Jaanong o tlhagisa gore mofine wa maaka o tshwanetse go dira eng fa e le gore o batla go nna o siame fa pele ga Morena.

### **Mosadi Yoo Jesebele.**

Moaposetoloi Jakobe o ne a re bontsha tsela e boleo bo e tsayang.

Jakobe 1:14-15, NW

*"Mme mongwe le mongwe o a raelesega fa a gogwa a ba a ngokelwa ke keletso ya gagwe.*

*Go tswa foo keletso, fa e sena go nna, e tshola boleo; boleo le jone, fa bo sena go diragadiwa, bo tsala loso."*

Jaanong se ke setshwantsho sa se tota se diragalang mo dipakeng tsa kereke. Fela jaaka boleo bo simologile fela ka maikutlo, loso la kereke le lone le simologile ka ditiro tse di sa reng sepe tsa Banikolaite. Go tswa mo ditirong go ne ga nna thuto. Go tswa mo thutong e e ne ya amogela maatla a puso le go simolola boheitane. Jaanong mo motlheng ono o ya kwa moporofeting wa one (morutintshi) mme ka jalo o tswelela pele go fitlha a iphitlhela a le mo bodibeng ja molelo, ka gonne ke gone koo a tla felelang teng, mo losong lwa bobedi.

Jaanong selemo sotlhe sa Modimo kgatlanong le paka e ya bonè se fitlhelwa fa a kgalang teng moperofeti yo wa mosadi, eleng Jesebele. Mme gore re tlhaloganye sentle gore ke ka ntlha ya eng fa a mo kgala jalo, re tla tshwanelwa ke go lebelela mo ditsong tsa gagwe mo Baebeleng mme fa re bona se a neng a se dira koo, re tla itse se se diragalang mo nakong ya gompieno.

Selo sa ntlha le se se botlhokwa thata se re se ithutang ka Jesebele ke gore ga se morwadia Aberahame, e bile go tsenngwa ga gagwe mo merafeng ya Iseraele ga se ga go amogelwa semoyeng jaaka go ne ga dirwa ke Ruthe wa Momoabe. Nnyaa, rra. Mosadi yo e ne e le morwadia Ethbaal, kgosi ya Sidona (mo go I Dikgosi 16:31), yo e neng e le moperesiti wa ga Ashethorethe. O ne a nna kgosi ka go bolaya yo o neng a mo eteletse pele e bong Pheles. Ka jalo re kgona go bona ka bonako gore e ne e le morwadia mmolai. (Se tota se re gopotsa Kaine.) Mme tsela e a neng a nna karolo ya Iseraele ka yone e ne e se ka ditsela tsa semoya tseo Modimo o neng o di tlhomile gore Baditšhaba ba amogelesega; mme o ne a tsena ka go nyala Ahabe, kgosi ya ditso tse di lesome tsa Iseraele. Jaanong tshwaragano e jaaka re bone e ne e se ya Semoya; e ne e le ya bopolotiki. Ka jalo mosadi yo yo o neng a ineetse mo kobamelong ya medingwana o ne a se na keletso epe ya go nna moobamedi wa Modimo yo o Esi wa Boammaaruri, mme go na le moo o ne a tla ka maikaelelo a a neng a sa belaele a go faposa Iseraele mo Moreneng.

Jaanong Baiseraele (merafe e e lesome) ba ne ba setse ba itse gore go obamela dinamane tsa gouta go ne go kaya eng, mme ba ne ba ise ba rekisediwe kobamelo ya medingwana, ka gonne Modimo o ne o obamelwa mme molao wa ga Moshe o ne o amogelwa. Mme go tloga ka nako ya fa Ahabe a ne a nyala Jesebele, kobamelo ya medingwana e ne ya anamale go oketsega ka tsela e e utlwisang bothoko. Fa mosadi yo a ne a nna moperesiti mo ditempeleng tse a neng a di agetse Astarte (Venus) le Baale (eleng modimo wa letsatsi) Baiseraele ba ne ba tsena mo mathateng.

Re akantse ka seno jaanong re ka simolola go bona se Moya wa Modimo o se dirang mo pakeng e ya Thiatira. Ke e.

Ahabe o ne a nyala Jesebele mme o ne a dira jalo e le tsela ya bopolotiki ya go nonotsha bogosi ja gagwe le go bo sireletsa. Ke sone tota se kereke e neng ya se dira fa e ne e nyalana le puso ka nako ya ga Constantine. Boobabedi ba ne ba kopana ka mabaka a sepolotiki, le fa gone ba ne ba dira ekare ke sengwe sa semowa. Gone jaanong ga go na ope yo o ka dirang gore ke dumele gore Constantine e ne e le Mokeresete. E ne e le moheitane yo o neng a lebega jaaka Mokeresete. O ne a takile difapaano tse ditshweu mo dithebeeng tsa masole. E ne e le ene mosimolodi wa Knights of Columbus. O ne a baya sefapaano mo toreng ya kereke ya St. Sophia mme ka go dira jalo a simolola ngwao.

E ne e le mogopolo wa ga Constantine go phutha batho botlhe, baheitane, Bakeresete ba leina fela le Bakeresete ba boammaaruri. Mme ka lobakanyana go ne go lebega e kete o tla atlega ka gonne badumedi ba boammaaruri ba ne ba tla go bona gore a ba ka kgona go busetsa ba ba neng ba kgelogetse kgakala le Lefoko. Fa ba ne ba bona gore ba ne ba ka se kgone go ba busetsa mo boammaaruring, ba ne ba patelesega go kgaogana le setlhophha sa sepolotiki. Mme fa ba dira jalo, ba ne ba bidiwa diingaudi mme ba bogisiwa.

Mma ke go bolelele gore re na le selo se se tshwanang se se diragalang jaanong. Batho botlhe ba a phuthegana ba kopana. Ba kwala Baebele e e tla tshwanelang mongwe le mongwe e ka tswa e le Mojuda, Mokatoliki kana Moporotesetanta. Ba na le Lekgotla la bone la Nicaea mme ba le bitsa Lekgotla la dikereke tsa mafatshe. Mme a o itse gore mekgatlho e yotlhe e lwa le mang? Ba lwa le Pentekosete ya boammaaruri. Ga ke bue ka mokgatlho o o bidiwang Pentekosete. Ke raya bao e leng ba Pentekosete ka gonne ba tletse ka Moya o o Boitshepo mme ba na le ditshupo le dimpho mo gare ga bone ka gonne ba tsamaya mo boammaaruring.

Fa Ahabe a ne a nyala Jesebele ka mabaka a bopolotiki o ne a rekisa botsalwapele ja gagwe. O nna leloko la mokgatlho mongwe mme o rekisa botsalwapele ja gago, mokaulengwe, a o batla go dumela kana nnyaa. Setlhopha sengwe le sengwe sa Baporotesetanta se se kileng sa tswa mme sa boela morago se ne sa rekisa botsalwapele ja gago, mme fa o rekisa botsalwapele, o tshwana fela le Esau—o ka lela le go ikwatlhaya go ya kafa o batlang ka teng, mme ga go kitla go go thusa ka sepe. Go na le selo se le sengwe fela se le ka se dirang mme ke gore, "Tswang mo go ene, batho ba me, mme le se ka la nna le seabe mo maleong a gagwe!" Jaanong fa e le gore ga o akanye gore ke nepile, araba potso e e le nngwe fela. A go na le motho ope yo o tshelang yo o ka mpoletelang gore ke kereke efe kana ke kgato efe ya Modimo e e kileng ya tsosolosiwa mme ya boa morago ga gore e tsene mo mokgatlhong mme ya nna lekoko? Balang mo ditsong. Ga o kgone go bona ope—le fa e le nngwe.

E ne e le nako ya bosigogare mo Iseraele fa a ne a ikopanya le lefatshe mme a tlogela dilo tsa asemoya mme a tsena mo dipolotiking. E ne e le ka nako ya bosigogare kwa Nicaea fa kereke e ne e dira selo se se tshwanang. Jaanong ke bosigogare fa dikereke di kopana jaanong.

Jaanong fa Ahabe a ne a nyala Jesebele o ne a mo letla gore a tseye madi a puso mme a age matlo a mabedi a magolo a kobamelo ya ga Ashethorethe le Baale. E e neng e agetswe Baale e ne e le kgolo mo e leng gore Baiseraele botlhe ba ne ba ka ya go e obamela. Mme fa Constantine le kereke ba ne ba nyalana o ne a ba naya dikago tsa kereke, a ba a tlhoma dibeso le ditshwantsho, mme a rulaganya thulaganyo ya maemo a a kwa godimo e e neng e setse e ntse e bopiwa.

Fa Jesebele a sena go nna le maatla a puso o ne a pateletsa batho go nna mo bodumeding ja gagwe mme a bolaya baporofeti le baperesiti ba Modimo. Go ne ga nna maswe thata mo Elija, morongwa wa paka ya gagwe, a neng a akanya gore ke ene fela yo o setseng, mme Modimo o ne a na le ba bangwe ba le 7000 ba ba neng ba sa khubamela Baale. Mme gone jaanong mo madumeding ao a Baptist, Methodist, Presbyterian, jalo le jalo, go na le bangwe ba ba tla tswang mme ba boele kwa Modimong. Ke batla gore o itse gore ga ke kgatlhong le batho e bile ga ke ise ke ko ke nne kgatlhong le bone. Ke lekoko—le tsamaiso ya makoko e keleng kgatlhong le yone. Ke tshwanetse go nna kgatlhong le yone ka gonne Modimo o di tlhoile.

Jaanong a re emeng fano ka motsotso mme re bo re boeletsa se re se buileng ka kobamelo ya kwa Thiatira. Ke ne ka mmolelela gore ba ne ba obamela Apollo (yo e neng e le modimo wa letsatsi) mmogo le mmusimogolo. Jaanong Apollo yono o ne a bidiwa 'yo o tlhagisang bosula.' O ne a tlosa bosula mo bathong. O ne a ba segofatsa mme a nna modimo wa mmatota mo go bone. O ne a tshwanetse go ruta batho. O ne a tlhalosa ka kobamelo, meletlo ya tempele, tirelo ya medimo, ditlhabelo le loso le botshelo morago ga loso. Tsela e a neng a dira seno ka yone e ne e le ka moperofeti wa mosadi yo o neng a dutse mo setulong se se nang le setulo sa maoto a mararo. Hei! A o a e bona?? Moporofeti yo wa mosadi yo o bidiwang Jesebele o teng mme o ruta batho. Mme thuto ya gagwe e tsietsa batlhanka ba Modimo mme e ba dira gore ba dire kgokafalo Jaanong kgokafalo e kaya 'go obamela medingwana.' Seo ke sone se sekao sa sone sa semowa. Ke kgolagano e e seng kafa molaong. Kgolagano ya ga Ahabe le ya ga Constantine ka bobedi e ne e se kafa molaong. Boobabedi ba ne ba dira kgokafalo ya semowa. Moakafadi mongwe le mongwe o tla felela mo letsheng la molelo. Modimo o buile jalo.

Jaanong ka jalo, thuto ya Kereke ya Katoliki (kereke e namagadi, ke mosadi) e gana Lefoko la Modimo. Mopapa yo tota e leng Apollo mo thanolong ya segompiano o rutile batho gore ba obamele medingwana. Kereke ya Roma jaanong e fetogile moperofeti wa maaka mo bathong ka gonne e tsere Lefoko la Morena mo bathong mme ya ba naya megopolo ya yone kaga se se kayang go itshwarelwa maleo, se se tliang masego a Modimo; mme baperesiti ba ile ba ya bokgakaleng ja go bolela ka phepafalo gore ga ba na maatla mo botshelong fela mme ba na le one le mo losong. Ba ruta gore go na le pakatori, mme ga o ka ke wa e bona mo Lefokong la Modimo. Ba ruta gore dithapelo le ditirelo tsa kereke le madi di tla dira gore o tswe mo pakatoring mme o ye legodimong. Tsamaiso yotlhe e e theilweng mo thutong ya yone ke maaka. Ga bo a ikaega ka motheo o o tlhomameng wa tshenolo ya Modimo mo Lefokong la Gagwe mme e ikaegile ka motlhaba o o reketlang, o o nwelang wa maaka a jone a bodiablo.

Kereke e ne ya tswa mo mokgatlhong mme ya nna lekoko mme ka jalo ya simolola go ruta maaka. Go ntse jalo. Baroma Katoliki ga ba dumele gore Modimo o mo Lefokong la Gagwe. Nnyaa, morena. Fa ba ne ba ka dira jalo ba ne ba tla tshwanelwa ke go ikwatlhaya mme ba boele morago, mme ba re Modimo o mo kerekeng ya Gagwe. Seo se ne se tla dira gore Baebele e nne kitso ya Kereke ya Katoliki. Ga go a nna

jalo. Bona se ba se dirileng ka kolobetso ya metsi fela. Ba ne ba e tlosa mo kolobetsong ya Bokeresete mme ba e dira ya boheitane ya direto.

Mma ke go bolelele ka maitemogelo a ke nnileng le one le moruti wa Katoliki. Mosetsana mongwe yo ke neng ke mo kolobeditse o ne a nna Mokatoliki, ka jalo moruti o ne a batla go mpotsolotsa ka ene. O ne a mmotsa gore o kolobeditse ka kolobetso efe. Ke ne ka mmolelela gore ke mo kolobeditse ka kolobetso ya Bokeresete e leng yone fela e ke neng ke e itse. Ke ne ke mo fitlhile mo metsing ka leina la Morena Jesu Keresete. Moruti o ne a mpolelela gore nako nngwe Kereke ya Katoliki e ne e dira jalo. Ke ne ka mmotsa ka yone nako eo gore Kereke ya Katoliki e ne e dira seo leng, ka gonne ke badile hisitori ya bone mme ke ne ka se ka ka bona se a neng a se bua. O ne a mpolelela gore e fitlhelwa mo Baebeleng, le gore Jesu o ne a rulaganya Kereke ya Katoliki. Ke ne ka mmotsa gore a ruri Petere e ne e le mopapa wa ntlha. O ne a gatelela gore Petere o ne a le teng. Ke ne ka mmotsa gore a Mmisa o ne o balwa ka Selatine gore ke tlhomamise gore o boammaaruri le gore ga o kitla o fetoga. O ne a re seo se boammaaruri. Ke ne ka mmolelela gore ke akanya gore ba ne ba fapogile thata mo go se ba neng ba na le sone kwa tshimologong, ka mo itsise gore fa e le gore Kereke ya Katoliki e ne e dumela tota mo bukeng ya Ditiro, ke ne ke le Mokatoliki wa bogologolo. O ne a mpolelela gore Baebele e ne e le pego ya Kereke ya Katoliki le gore Modimo o ne a le mo kerekeng. Ke ne ke sa dumalane le ene ka gonne Modimo o mo Lefokong la Gagwe.

A Modimo a nne boammaaruri mme motho mongwe le mongwe a nne moaki. Fa lo ka tlosa sengwe mo bukeng eo kgotsa la oketsa sengwe mo go yone, Modimo o solofeditse gore o tla oketsa ditlamorago tse di bothoko mo go ba ba oketsang le go tlosa karolo ya bone mo bukeng ya botshelo fa ba ka leka go e fokotsa. Tshenolo 22:18, 19.

Mma ke go bontshe fela gore Kereke ya Katoliki ya Roma e dumela jang gore Modimo o mo kerekeng go na le Lefoko. Se ke sengwe se se tserweng mo bukeng ya malatsi a ga Mopapa John wa bo 23. "Maitemogelo a me mo dingwageng tseno tse tharo ke le Mopapa, fa e sa le ke amogela tirelo eno 'ka poifo le ka go roroma' ka go ikobela thato ya Morena ka botlalo, e ke e neilweng ke Mokgatlho o o Boitshepo wa Bakadinale ka nako ya khonkhale, ke bosupi jwa mafoko ano mme ke lebaka le le amang pelo le le nnelang ruri la gore ke nne ke ikanyega mo go one; ke ikanya Modimo ka botlalo mo go sengwe le sengwe se se amanang le gone jaanong, le go ritibala ka botlalo malebana le isagwe." Mopapa yo o bolela gore Modimo o ne a bua ka kereke a senola thato ya Gagwe. A bo e le maaka jang ne. Modimo o mo Lefokong la Gagwe mme o bua ka lone a senola thato ya Gagwe. Gape o ne a bolela gore o ne a ikanya lefoko la batho ka botlalo mme ka jalo a le ikobela ka kagiso. Go utlwala go le monate mme gone go phoso. Fela jaaka go ne go ntse ka go sokama mo Tshimong ya Edene.

Jaanong a re ye kwa go Tshenolo 17 mme re bone mosadi yono, kereke, yo o tshelang ka dipolelelopele tsa maaka e seng Lefoko la Modimo. Mo temaneng ya ntlha Modimo o mmitsa seaka se segolo. Ke ka ntlha ya eng fa e le seaka? Ka gonne o obamela medingwana. O dirile gore batho ba nne le bothata jo bo tshwanang. Go obamela medingwana go ka alafiwa jang? Lefoko la Modimo. Ka jalo mosadi yo ke seaka ka gonne o tlogetse Lefoko. O ntse mo godimo ga metsi a mantsi, a a kayang boidiidi ja batho. E le ruri e e tshwanetse ya bo e le kereke ya maaka ka gonne kereke ya Modimo e nnye—ke ba se kafe ba fitlhelwang mo go yone.

Ela tlhoko gore o ntse jang mo matlhong a Modimo, go sa kgathalesege gore o lebega a le montle go le kana kang mo bathong le gore o utlwala a le botlhajana go le kana kang. O tagilwe ke boaka ja gagwe. Jaanong o ne a tagilwe ke madi a baswelatumelo. Fela jaaka Jesebele yo o neng a bolaya baporofeti le baperesiti mme a bolaya batho ba Modimo ba ba neng ba sa obamele Baale. Mme ke sone se Kereke ya Katoliki e neng ya se dira. Ba ne ba bolaya batho ba ba neng ba sa inelee mo pusong ya bomopapa. Ba ba neng ba batla Lefoko la Modimo go na le mafoko a batho ba ne ba bolawa, gantsi ka ditsela tse di setlhogo. Mme kereke eno e e neng e dira ka loso e ne e sule ka boyone mme e ne e sa itse. O ne a se na botshelo e bile go ne go se na ditshupo dipe the di neng a mo latela.

### **Sebaka ya go Ikwatlhaya**

Tshenolo 2:21;

*"Ke mo neile sebaka gore a ikwatlhaele boaka ja gagwe; mme ga a rate go ikwatlhaela boaka ja gagwe."*

A o ne o itse gore tota kereke eno e ne e le bosula go feta Ahabe? A o a itse gore o ne a ikwatlhaya ka nakwana mme a tsamaya ka bonolo fa pele ga Modimo? O ka se ka wa bua jalo ka Kereke ya Roma Katoliki. Nyaa rra. Ga a ise a ko a ikwatlhae mme o ile a senya mongwe le mongwe yo o neng a leka go mo thusa go ikwatlhaya. Seo ke ditso, Jaanong Modimo ga a ka a nna a romela baaposetoloi fela mo motlheng mongwe le mongwe mme gape o ne a romela baemedi ba ba molemo ba ba neng ba tla thusa baaposetoloi bao. O ne a naya motlha mongwe le mongwe banna ba ba molemo ba Modimo mme ba ne ba dira sotlhe se ba neng ba ka se kgona go busetsa kereke kwa Modimong. Eleruri Modimo o ne a mo naya tshono le go mo thusa gore a ikwatlhaye. A o kile a ikwatlhaya a bo a bontsha ka maungo a gagwe

gore o dirile jalo? Nyaa rra. Ga a ise a ko a dire jalo e bile ga a kitla a dira jalo. O tagilwe. O latlhegetswe ke tlhaloganyo mo dilong tsa semoya.

Jaanong o se ka wa tlhakana tlhogo mme wa simolola go akanya gore Kereke ya Roma e ikwatlhaetse go bolaya ga yone bapostolosi ka gonne e leka go kopana le Baporotesetanta ka go dira gore ditumelo tsa yone di tsamaisane le tsa Baporotesetanta. Ga a ise a ko a kope maitshwarelo le fa e le gangwe a bo a re o ne a le phoso ka go bolaya batho ba le bantsi. Mme le ene ga a kitla a dira jalo. Mme go sa kgathalesege gore o lebega a le bonolo e bile a le botsalano go le kana kang ka nako eno, o tla tswela a bolaya, ka gonne go bolaya go mo pelong ya gagwe e e boikepo le e e sa ikwatlhayeng.

### **Katholo Kgatlanong le Seaka e a Ntshiwa**

Tshenolo 2:22-23,

*"Bona, ke tla mo latlhela mo bolaong ja bolwetse, le ba ba dirang boaka nae ke ba latlhela mo pitlaganong e kgolo, fa ba sa ikwatlhaele ditiro tsa gagwe."*

*Bana ba gagwe ke tla ba bolaya ka loso; mme diphuthego tsothe di tla itse gore ke nna yo o tlhotlhomisang diphilo le dipelo, mme ke tla naya mongwe le mongwe wa lona ka fa ditirong tsa lona."*

Eng? Mosadi yo o na le bana? Mme ene ke seaka? Fa e le gore go ntse jalo gore o ne a nna le bana ka ntlha ya boaka jwa gagwe o tshwanetse go fisiwa ka molelo jaaka Lefoko le buile. Seo ke boammaaruri tota. Seo ke phelelo ya gagwe gonne o tla sha mo molelong. Bokhutlo ja gagwe ke bodiba ja molelo. Mme ema mme o akanye ka bana bano ka nakwana. Mosadi ke ene a tsalang bana. Go phepafetse gore mosadi yono o ne a tshola bana mme ba ne ba dira se a neng a se dira. Mpontshe kereke e le nngwe e e kileng ya kgaogana le phuthego mme ya se ka ya boela mo go yone. Ga go na ope. Ga go na ope. Ba-Lutheran ba ne ba tla mme ba rulaganya gape mme gompieno ba dirisana mmogo le mokgatloho ono wa dikereke tsa mafatshe. Ba-Methodist ba ne ba tla mme ba ba rulaganya gape. Ba-Pentekosete ba ne ba tla mme ba rulaganya dilo ka bonako. Go tla nna le yo mongwe yo o tla tswang, mme re baka Modimo ka gore ga ba kitla ba boa ba rulagannngwa gape ka gonne ba itse boammaaruri. Setlhopha seo e tla nna monyadiwa wa letsatsi la bofelo.

Jaanong go ne go kwadilwe fano gore seaka se se ne se na le bana. Jaanong e ne e le eng? E ne e le bomorwadie, ka gonne e ne e le dikereke fela jaaka ene. Jaanong go na le ntlha e e kgatlang tota. Jesebele le Ahabe ba ne ba na le morwadiabone. Morwadie yoo o ne a nyala Jehorame morwa Jehoshafate mme mo go II Dikgosi 8:16 go bolelwa gore

*"Joram o ne a tsamaya mo ditseleng tsa ga mogwagwadiagwe."*

O ne a simolola go obamela medingwana ka lenyalo leno. O ne a dira gore Juda yo o boifang Modimo le yo o mo obamelang a obamele medingwana. Ke sone se dikereke tseno tsothe tse e leng bomorwadie di se dirileng, fela jaaka ke ile ka lo bontsha. Ba simolola mo boammaaruring mme ba nyalana mo mokgatlong mme ba tlogela Lefoko go latela ngwao, ditumelo, jalo le jalo. Jaanong mma ke fetise seno.

Bahebera 13:7 ya re,

*"Utlwang ba ba lo eteletseng pele, ba ba lo boleletseng lefoko la Modimo."*

Lefoko ke lone le re busang, e seng batho. Jaanong monna jaaka monna ke tlhogo ya mosadi. O a mo laola. Mme kereke le yone ke mosadi, mme mmusi wa yone ke Lefoko. Jeso ke Lefoko. Fa a gana Lefoko mme a tsaya botlhogo bope jo bongwe, ke seaka. Jaanong mpolelele leina la kereke e le nngwe e e sa latlheng Lefoko la Modimo gore e amogele dingwao le ditumelo. Botlhe ke bagokafadi — jaaka mmè, jaaka morwadie.

Seaka le bana ba sone ba tla otlhaiwa jang? Ee, e tsile go nna gabedi. Sa ntlha o ne a re, "Ke tla mo latlhela mo bolaong." Go ya ka karolo ya bofelo ya temana 22 e tla nna bolao ja pitlagano, kana pitlagano e kgolo. Ke sone tota se Jesu a neng a se bua mo go Mathaio 25:1-13. Go ne go na le makgarebane a le lesome. A matlhano a ona a ne a le dieleele, a matlhano a le botlhale. Ba ba tlhano ba ba botlhale ba ne ba na le oli (Moya o o Boitshepo) mme ba bangwe ba batlhano bone ba ne ba se na yone. Fa go ne go goelediwa go twe, 'Monyadi o etla,' makgarebane a matlhano a a dieleele a ne a ya go batla leokwane fa makgarebane a matlhano a a botlhale one a ne a ya kwa lenyalong. Ba ba batlhano ba ba neng ba sala kwa ntle ba ne ba tlogelwa gore ba ye pitlaganong e kgolo. Ke sone se se tla diragalelang batho botlhe ba ba tla senekng ba tsamaya mo phamolong. Ke sone se se tla diragalelang seaka le bomorwadie. Sa bobedi, e bolela gore o tla ba bolaya ka loso kgotsa jaaka thanolo ya mmatota e bolela, "A ba bolawe ka loso." Se ke polelo e e sa tlwaelegang. Re ka nna ra re, "A motho a bolawe ka go kalediwa, kgotsa ka go tsenngwa motlakase kgotsa ka tsela nngwe." Mme fa go laetswe gatwe, 'A ba bolawe.' Leso ka bolone ke lone le lle bakileng leso la bone.

Jaanong ke batla gore le bone seno sentle gore ke tle ke dirise setshwantsho sa rona gape sa morwadia Jesebele yo o nyalang ntlo ya Juda mme ka go dira jalo a e tsenya mo kobamelong ya medimo ya disetwa mme a dira gore Modimo a bolaye Juda. Ke sone se Balame aneng a se dira, le e ne. Ka jalo, Jesebele o ne a le fa ka boheitane jwa gagwe.. Go na le Juda koo yo o obamelang Modimo ka tsela e e tshwanetseng mme a tshela ka fa tlase ga Lefoko. Ka jalo, Jesebele o nyala morwadie Jehorame. Ka yone nako eo, Jehorame o dira gore batho ba obamele medingwana ya disetswa. Ka bonako fela fa ba sena go nyalana, Juda o ne a sweletse ruri. Leso la semoya le ne la tsena. Fa kereke ya ntlha ya Roma e sena go rulagannngwa e nna mokgatlho, e ne ya swa. Fa Balutere ba sena go rulagannngwa banna mokgatlho, lesa le ne la tla mme ba swa. Ba-Pentekosete ba ne ba tla kwa morago mme ba rulaganya ba nna mokgatlho. Mowa o tsamaile, le fa ba sa dumele. Mme o ne a dira jalo. Lenyalo leo le ne la tisa lesa. Go tswa foo go ne ga tla lesedi la Bongwefela jwa Bomodimo. Le bone ba ne ba rulaganya mme ba swa. Morago ga gore molelo wa Modimo o wele mo Nokeng ya Ohio ka 1933 go ne ga nna le tsosoloso ya phodiso mo lefatsheng lotlhe, mme ga e ise e ko e dirwe ke mokgatlho ope. Modimo o ne a ya kwa ntle ga ditlhopho tsa Pentekosete, kwa ntle ga phuthego, mme seo A tlileng go se dira mo isagweng le sone se tla nna kwa ntle ga phuthego. Modimo ga a kgone go dira ka baswi. A ka dira fela ka maloko a a TSHELANG. Maloko ao a a tshelang a kwa ntle ga Babelona.

Ka jalo, o a bona, "Leso" kana "Thulaganyo" e ne ya tla, mme kereke ya swa, kana go bua ka tsela e e utlwalang sentle lesa le ne la nna moagi mo go neng go busa BOTSHELO fela ka nakwana pele ga foo. Fela jaaka Efa wa kwa tshimologong a ne a tlišetsa batho lesa, jaanong phuthego le yone e tlišitse lesa, ka gonne thulaganyo ke selo se se dirilweng ke baikepi ba babedi, e leng Bonikolaitane le BoBalaame, ba ba neng ba rotloediwa ke moporofeti wa mosadi e bong Jesebele. Jaanong Efa o ne a tshwanetse go fisiwa le noga ka ntlha ya tiro ya bone e e maswe. Mme Adame o ne a tsernelela go tshereganya, a mo tsaya ka bonako gore a tle a bolokwe. Mme fa bodumedi jo ja ga Satane bo setse bo feditse dingwaga di le dintsi, ga go kitla go nna le ope yo o tla bo tsayang kgato, mme bo tla fisiwa le motsietsi wa bone, ka gonne seaka le bana ba sone le moganetsakeresete le Satane botlhe ba tla tsena mo bodibeng ja molelo.

Ke tla bo ke itlhaganelela go bua mme gongwe ke tshwanetse go beela molaetsa o nako e e tlang, mme go lebega go tshwanela gore ke o tsenye gone jaanong ka gonne o bua ka tsela e e utlwalang sentle ka thulaganyo le se se tla diregang ka yone. Mme ke batla go go tlhagisa.

Tshenolo 13:1-18,

*"Mme ka bona sebatana se tthatloga mo lewatleng, se na le ditlhogo di supa le dinaka di le some, mme mo dinakeng tsa sone go na le dikorone di le lesome, mme mo ditlhogong tsa sone go na le maina a kgalo.*

*Sebatana se ke se bonyeng se ne se tshwana le nkwe, mme dinao tsa sone di ne di tshwana le tsa bera, le molomo wa sone o tshwana le molomo wa tau. Mme kgogela ya se naya thata ya yone le setulo sa yone sa bogosi le taolo e kgalo.*

*Mme ka bona nngwe ya ditlhogo tsa yone jaaka e kete e ne e gobetse go isa losong, mme ntho ya yone e e bolayang e ne ya fola, mme lefatshe lotlhe la kgatlhega la sala sebatana morago.*

*Mme ba obamela kgogela e e neng e neile sebatana thata ya yone. Ba obamela sebatana ba re: "Ke mang yo o tshwanang le sebatana?" Ke mang yo o kgonang go lwa le ene?*

*Mme sa newa molomo wa go bua dilo tse dikgolo le ditlhapatso; sa newa thata ya go tswela dikgwedi di le 42.*

*Mme e ne ya bula molomo wa yona go tshapatsa Modimo, go tshapatsa leina ya one, le boago ja One, le ba ba nnang kwa legodimong.*

*Mme sa newa go lwa le baitshepi, le go ba fenya; sa newa thata mo letsong lengwe le lengwe, le mo puong nngwe le nngwe, le mo merafeng yotlhe.*

*Mme botlhe ba ba agileng mo lefatsheng ba tla se obamela, ba maina a bone a sa kwalwang mo lokwalong lwa botshelo lwa Kwana e esaleng e tshabilwe go tloga tsholegong ya lefatshe.*

*Yo o nang le ditsebe a a utlwe!*

*Yo o isang mo botshwarong o tla isiwa mo botshwarong; yo o bolayang ka tshaka o tla bolawa ka tshaka. Foo go batlega bopelotelele le tumelo ya baitshepi.*

*Jaanong ka bona sebatana se sengwe se tthatloga mo lefatsheng, se na le dinaka tse pedi jaaka tsa kwanyana, mme se bua jaaka kgogela.*

*Se dirisa thata yotlhe ya sebata sa ntlha fa pele ga sone, se dira gore lefatshe le ba ba*

*agileng mo go lone ba obamele sebata sa ntlha se ntho ya sone e e bolayang e ne ya fodisiwa.*

*Sa dira ditshupo tse dikgolo, sa ba sa nesa molelo mo lefatsheng o tswa legodimong fa pele ga batho.*

*Mme sa tsietsa ba ba agileng mo lefatsheng ka ditshupo tse se neilweng go di dira fa pele ga sebata, sa ba sa ba raya sa re, ba ba agileng mo lefatsheng ba dire setshwantsho sa sebata se se neng se gobetse ka tšhaka, mme sa tshela.*

*Mme sa newa thata ya go neela setshwantsho sa sebatana botshelo, gore setshwantsho sa sebatana se bue, le go bolaya botlhe ba ba sa obameleng setshwantsho sa sebatana.*

*Mme sa dira gore botlhe, ba bannye le ba bagolo, bahumi le bahumanegi, bagololesegi le batlhanka, ba tshwaiwe ka letshwao mo diatleng tsa bone tse di jang gongwe mo diphatleng tsa bone:*

*Le gore go se nne ope yo o ka rekang, le fa e le go rekisa, fa e se yo o nang le letshwao, e bong leina la sebata, gongwe palo ya leina la sone.*

*Botlhale ke jo. Yo o nang le tlhologanyo a a bale palo ya sebatana; gone ke palo ya motho: palo ya sone ke makgolo a marataro le masome a marataro le borataro."*

Kgaolo e e bontsha maatla a Kereke ya Roma ya Katoliki le se e tla se dirang ka thulaganyo. Gakologelwa gore se ke mofine wa maaka. A e tswelele e bitse leina la Morena, mme e dira jalo fela ka maaka. Botlhogo ja yone ga se ja Morena mme ke ja ga Satane. Kgabagare e feleletsa e tshwana gotlhelele le sebatana. Seaka se se palameng sebatana se se mmala wa bohobidu jo bo letlhololo se bontsha sentle gore maatla a sone ke a modimo wa maatla (Satane) e seng a Modimo wa rona, Morena Jesu Keresete.

Mo temaneng ya 17, e bontsha ka phepafalo gore o tla laola kgwebo ya lefatshe ka botlalo, ka gone ga go na motho ope yo o ka rekang kana go rekisa kwantle ga gagwe. Se se tlhomamisiwa ke Tshenolo 18:9-17 e e bontshang gore o ne a na le dikamano le dikgosi, dikgosana, bagwebi, bao botlhe ba neng ba amana le Roma le kgwebo.

Mo go Tshenolō 13:14, re ithuta gore sebatana se anamisa tlhotlheletso ya sone ka setshwantsho se se neng se diretswe sone. Setshwantsho seo se dirwang ke lekgotla la lefatshe lotlhe la dikereke, le mo go lone dikereke tsotlhe tse di rulagantsweng di tla kopanang le Baroma Katoliki (ba ntse ba dira jalo le jaanong). Go ka direga thata gore kopano e e tla tla gore go emisiwe maatla a bokomonise. Mme ereka bokomonisi jo bo tshwanang le ja ga Nebukadnesare bo tsositswe go fisa nama ya seaka, Roma e tla fengwa le go sengwa. Ela tlhoko gore gongwe le gongwe koo kereke ya Roma e neng e ya teng, bokomonise bo ne bo e sala morago. Go tshwanetse ga nna ka tsela e e ntseng jalo. Mme mma ke go tlhagise jaanong, o se ka wa akanya gore bokomonisi ke mmaba wa gago fela. Nyaa rra. Kereke ya Katoliki le yone e ntse jalo, mme le e leng go feta.

Jaanong a re baleng Tshenolo 13:1-4, mme re e bapise le Tshenolo 12:1-5. Tshenolo 13:1-4,

*"Ka bona sebatana sengwe se tthatloga mo lewatleng, se na le dinaka di le some le ditlhogo di supa, mo dinakeng tsa sone ga bo go le dirwalo tsa mekgabo di le some, mo ditlhogong tsa sone ga bo go le maina a tlhapatso.*

*Sebatana se ke se bonyeng sa bo se tshwana le nkwe, maroo a sone a bo a ntse jaaka maroo a bera, molomo wa sone o ntse jaaka molomo wa tau; mme kgogela ya se naya thata ya yone, le setulo sa yone sa bogosi, le taolo e kgolo..*

*Ka bona tlhogo nngwe ya sone, e kete e kile ya rengwa ya swa; mme go rengwa ga yone ga loso ga bo go fodile; mme lefatshe lotlhe la gakgamalela sebatana se, la se sala morago.*

*mme ba obamela kgogela, ka e neile sebatana taolo ya yone; ba obamela sebatana ba re: "Mang yo o tshwanang le sebatana? Mang yo o nonofileng go tlabana le sone?"*

Tshenolo 12:1-5,

*"Ga bonala sesupo se segolo mo legodimong; e bong mosadi a apere letsatsi, kgwedi yone e le fa tlase ga dinao tsa gagwe, mo tlhogong ya gagwe go le serwalo sa dinaledi di le 12:*

*A bo a le moimana; mme a goa ka go iteka mo pelegong, a le mo botlhokong jwa go gololwa.*

*Mme ga bonala sesupo se sengwe mo legodimong; bonang, ga bo go le kgogela e kgolo e le khibidu, e na le ditlhogo di supa, le dinaka di le some, mo ditlhogong tsa yone ga bo go le dirwalo tsa mekgabo di supa.*

*Mogatla wa yone, wa bo o goga ntlha ya seraro ya dinaledi tsa legodimo, mme ya di latlhela kwa lefatsheng. Kgogela ya ema fa pele ga mosadi yo o tlaa tlogang a belega, gore e tle e re a sena go belega, e be e je ngwana wa gagwe.*

*Mme a belega ngwana wa mosimane, yo e leng ene yo o tlaa busang ditšhaba tsotlhe ka tsamma ya tshipi: mme ngwana wa gagwe a phamolwa a isiwa kwa Modimong, le kwa setulong sa one sa bogosi."*

Satane le bodumedi ja gagwe ja ga Satane ba mo dibataneng tse ka bobedi. Mo go Tshenolo 14, sebatana se se neng sa gobadiwa go isa lesong mme sa tshela gape ke Roma ya boheitane ya mmusomogolo e e neng ya tlhaselwa ke batho ba ba setlhogo mme ka jalo ya latlhegelwa ke thata ya sone a selefatshe. Mme o ne a nna gape le thata ka mmuso wa kwa Roma wa bomopapa. A o a e lemoga? Setšhaba se se neng sa busa ka go thubaganya sengwe le sengwe mme sa nna mmusomogolo o o nonofileng go gaisa otlhe o o kileng wa nna teng, kgabagare se ne sa tlhokofadiwa go fitlhelela se swa. Maatla a gagwe a ne a sa tlhole a le teng mo mmeleng jaaka a ne a laolwa ke masole jalo le jalo. Mme ka nako ya ga Constantine o ne a boa a tshela gape, ka gonne puso ya bomopapa ya Roma e ne ya tsena mo lefatsheng lotlhe, mme maatla a gagwe a ne a feletse. O dirisa dikgosi le bagwebi mme ka maatla a gagwe a bodumedi le a madi a a bolayang o busa jaaka modimo wa sesadi wa motlha ono. Gape ke kgogela e e neng e emetse go feleletsa ngwana wa mosimane. Herode o ne a leka go bolaya Morena Jesu mme a palelwa. Moragonyana Jesu o ne a bapolwa ke masole a Roma, mme jaanong o tthatlosediwa mo setulong sa bogosi.

Jaanong fa re ntse re sekaseka se ke sa tswang go se bua, gakologelwa ponatshegelo ya ga Daniele. Karolo ya bofelo ya setshwantsho, e leng mmusomogolo wa bofelo wa lefatshe, e ne e le mo dinaong. E ne e le tshipi le letsopa. Bona, tshipi ke Mmusomogolo wa Roma. Mme jaanong ga e tlhole e le tshipi e e thata. Letsopa le tlhakane le yone. Le fa go ntse jalo, bo teng e bile bo laola dilo tsa lefatshe mo ditšhabeng tsa tomokoraga le tse di gatelelang thata. Kereke ya Roma e mo setšhabeng sengwe le sengwe. E tlhakane le dilo tsotlhe.

Mma ke go bolelele sengwe ka tshipi le letsopa. A o gakologelwa fa Khrushchev a ne a itaya setlhako sa gagwe mo tafoleng ka nako ya phutlhego ya mafatshe ya United Nations (UN)? Go ne go na le ditšhaba di le tlhano tsa kwa botlhaba le tse tlhano tsa kwa bophirima. Khrushchev o ne a bua mo boemong ja Botlhaba mme Tautona Eisenhower ene a bua mo boemong ja Bophirima. Ka Se-Russia, Khrushchev ke letsopa mme Eisenhower ke tshipi. Baeteledipele ba bagolo ba babedi ba lefatshe, menwana e mebedi e megolo ya dinao tsa tshipi le letsopa, e ne e bapile. Re mo bokhutlong ja dilo tse tsotlhe.

Mo temaneng ya 4 e botsa jaana,

*"Ke mang yo o kgonang go lwa le sebatana?"*

Gone jaanong go na le maina mangwe a magolo mo lefatsheng. Go na le ditšhaba tse di kgolo, mme gompiano go laola Roma. Mopapa o ke ene a laolang. Mme thata ya gagwe e tla oketsega. Ga go na ope yo o ka mo lwantshang.

Temana 6,

*"Mme a bula molomo wa gagwe a tlhapatsa."*

(ba ruta dithuto tse e leng ditaolo tsa batho, ba le bogagapa, ba ikgogomosa, ba rata dikgatlhego, ba na le sebopego sa poifo-Modimo, mme ba latola thata ya yone.) O ne a tlhapatsa Leina la Modimo—ka go le fetola go nna direto le go gana go dira se se farologaneng le seo.

Temana 7,

*"Mme sa letelelwa go lwa le baitshepi."*

Pogiso—mo modumeding wa boammaaruri le botlhe mo Leineng la Morena gore Leina la Modimo le tlhapadiwe, fela jaaka go ntse kwa Russia, ka ntlha ya se bodumedi jwa Katoliki bo se dirileng koo.

Temana 8,

*"Mme botlhe ba ba agileng mo lefatsheng ba tla se obamela, ba maina a bone a sa kwalwang mo lokwalong lwa botshelo lwa Kwana e e tlhabilweng go tloga tlhologong ya lefatshe."*

Re leboga Modimo gore dinku ga di kitla di mo obamele. Batho botlhe kwantle ga ba ba tlhophilweng ba tla tsiediwa. Mme ga ba kitla ba tsiediwa. Gonne di utlwa lentswe la Modisa mme di mo sala morago.

Jaanong, bona seno, se re ntseng re leka go se go bontsha. Peo e ya lesa e e simologileng mo pakeng ya ntlha—peo e ya lekoko, kgabagare e ile ya gola ya nna setlhare se dinonyane tsotlhe tse di bosula di nnang mo go sone. Go sa kgathalesege se a se buang sa gore ke ene yo o nayang botshelo, ke ene yo o nayang lesa. Maungo a gagwe ke LESO. Ba ba jang nama ya gagwe ba sule. Tsamaiso e e maatla ya lefatshe ya kereke e e tsietsang lefatshe le le nang le poloko ya senama le ya semoya e tsietsa le go senya boidiidi ja batho. Mme ga se fela gore o tshwantshetsa lesa, mme sebopiwa se se se suleng se tla bolawa ka lesa le e leng letsha la molelo. E kete batho ba ka lemoga gore bokhutlo ja bone e tla nna eng ka go nna mo go ene. "Tswang mo go ene, gonne ke ka ntlha ya eng fa le tla swa?"

### **Tlhagiso ya Bofelo**

Tshenolo 2:23.

*"Ke tlaa bolaya bana ba gagwe ka lesa; mme diphuthego tsotlhe di tlaa itse fa e le nna yo ke itseng diphilo le dipelo; mme ke tlaa naya mongwe le mongwe wa lona ka fa ditirong tsa lona."*

Modimo o leba pelo. Seo ga se ise se ke se fetoge. E bile ga e kitla e fetoga. Fa, jaaka go ntse go ralala metlha yotlhe go na le ditlhopho tse pedi, tseo ka bobedi jwa tsone di boelang tshenolo ya tsone e e tswang kwa Modimong le kamano ya tsone le Modimo.

*"Le fa go ntse jalo motheo o o tlhomameng wa Modimo o eme, o na le sekano se: "Morena o itse ba e leng ba gagwe."*

Timotheo 2:19.

*"Morena o tthatlhoba maikaelelo a pelo."*

Lefoko 'batla' le raya 'go sala morago' kgotsa 'go latela'. Modimo o sekaseka dikakanyo (maikaelelo) tsa rona; o itse se se mo dipelong tsa rona. O bona ditiro tsa rona tse di bontshang se tota re leng sone. Ke mo pelong mo go tswang tshiamo kana boikepo. Maikaelelo a rona, maikaelelo—a rona otlhe a itsiwe ke ene ka gonne o bona sengwe le sengwe se re se dirang. Mme tiro nngwe le nngwe, lefoko lengwe le lengwe le tla sekisiwa fa re ikarabelela ka matshelo a rona. Go ne go se na poifo ya Modimo pele ga mofine wa maaka mme ba tlile go duela ka tsela e e botlhoko. A botlhe ba ba bitsang leina la gagwe ba tshela ka tsela e e tshwanelang baitshepi. Re ka nna ra tsietsa batho mme ga re kitla re tsietsa Morena.

### **Tsholofetso mo Malatsing Ao a a Lefifi.**

Tshenolo 2:24-25.

*"Mme lona ba bangwe ba le mo Thiatira, ba le sa dumalaneng le thuto eo, ba le sa itseng dilo tse ba di bitsang masaitsweng a ga Satane, ke le raya ke re: Ga ke kitla ke le rwea morwalo ope o sele."*

*Mme tshwarelelela se le nang le sone go fitlhela ke tla."*

Jaanong pele ga re tsena mo tsholofetsong e ntetleng gore ke go bontshe gape gore kereke jaaka e buiwa ke Mowa mo bukeng e e na le dikala tse pedi tsa mofine tse dikala tsa tsone di e bopang.

*"Mme ke lo raya ke re, lona le ba bangwe ba le mo Thiatira, ba le sa tsholeng thuto e."*

Ke eo. O bua le ditlhopho tse pedi. Yo mongwe o na le thuto, yo mongwe ga a na yone. Ba teng koo, ba gasame mo ditšhabeng tsotlhe ba na le dithuto tse di ganetsanang. Yo mongwe ke wa Modimo, yo o itseng dilo tse di boteng tsa Gagwe, yo mongwe ke wa ga Satane, yo o itseng dilo tse di boteng tsa ga Satane.

*"Ga nkitla ke le imetsa ka morwalo o mongwe gape."*

Lefoko morwalo le raya bokete kgotsa kgatelelo. Kgatelelo ya Dilaka tsa Lefifi e ne e dira gore motho a ineele kgotsa a se ka a ineele. Go ineele kana go swa. E ne e le Kgatlatshekelo ya Dikgotlatshekelo Tse di Kgatlhanong le Boingaudi, e leng puso e e neng e eme nokeng kobamelo ya ga Satane. Nna leloko la mokgatlho kana o duele ka botshelo ja gago. Nako nngwe le nngwe e ne e na le dikgatelelo tsa yone. Ka sekai, mokgweleo o mogolo wa paka wa bofelo ke kgatelelo ya dikhumo, botshelo jo bo bo monate le malwetsa amantsi a pelo mo motlheng o o raraaneng o re lebegang re sa tshwanelege go tshela mo go one. Go bonala fa paka e ya bone e nnile le bokete thata. E ne e le go ganetsa Roma, go emela Lefoko la Modimo go fitlha lesong.



*"Ba ne ba ise ba itse dilo tse di boteng tsa ga Satane."*

Go bonala fa bakwadi ba Baebele ba tlogetse temana e e sa kwalwa ka gonne ba ne ba sa kgone go lemoga gore ke thuto efe kana gore ke maitemogelo afe a a kaiwang ke polelwana e Tota e bile go motlhofo go itse gore go buiwa ka eng. A re simolole pele ka go itse gore boteng ja Modimo ke eng, mme go tla bo go sa tshwane go e tla bo e le boteng ja ga Satane.

Mo go Baefeso 3:16.

*"Gore a le neye, go thatafadiwa ka nonofo mo mothong yo o kwa teng, ka Mowa wa gagwe, ka fa mahumong a kgalalelo ya gagwe;*

*Gore Keresete a age mo dipelong tsa lona ka tumelo; e tle e re ka le namisitswe medi le nitame mo loratong,*

*Gore le tle le kgone go tlhaloganya le baitshepi botlhe gore bophara le boleele le bogodimo le boteng ke eng;*

*Le go itse lerato la ga Keresete le le fetang kitso, gore le tladiwe ka botlalo jotlhe ja Modimo."*

Jaanong go ya ka ditemana tse, fa motho a itemogela boteng ja Modimo mo botshelong ja gagwe, ke boitemogelo ja mmatota ja gore Mowa wa Modimo o nna mo go ene, mme mogopolo wa gagwe o sedifadiwa ke botlhale le kitso ya Modimo ka Lefoko. Mme se Satane a tla se dirang ke gore o tla leka go senya se. O tla nna ka metlha a leka go dira sengwe se se tla emisetsang boammaaruri jo ja Modimo. O tla se dira jang? O tla tlosa kitso ya boammaaruri ja Modimo—a bo a senya Lefoko ka go tsenya la gagwe, "Ee, a Modimo o buile?" Go tswa foo o tla emisetsa Keresete yo o mo meweng ya rona. O tla dira jalo, fela jaaka a ne a dira gore Baiseraele ba dire se se tshwanang; ka motho yo o busang e le kgosi mo boemong ja Modimo. Boitemogelo ja go tsalwa sesha bo tla ganwa le fa go ntse jalo go nna leloko la kereke ke gone mo go tla amogelwang. Satane o ne a setse a tseneletse kwa tengteng mo pakeng eo. Mme maungo a boteng ja ga Satane e eleng maaka, dipolao le bokebekwa jo bo maswe a ne a tswa mo go yone.

## Dituelo

Tshenolo 2:26-29.

*"Yo o fenyang, le yo o bolokelang ditiro tsa me go ya kwa bofelong, ke ene yo ke tlaa mo nayang taolo mo merafeng;*

*Mme o tlaa e laola ka tsamma ya tshipi; fela jaaka dijana tsa mmopi di tle di thubagangwe; jaaka le nna ke amogetse mo go Rre.*

*Mme ke tlaa mo naya naledi ya moso.*

*Yo o nang le ditsebe a a utlwe se Mowa o se bolelelang diphuthego."*

"Yo o fenyang, a ba a tshegetsa ditiro tsa me go ya bokhutlong, ke tla mo naya lefatshe la gagwe."

Go phepafetse thata go tswa mo dikakgelong tsa Mowa ka ga ditiro gore Morena o leka go dira gore ba Gagwe ba bone mogopolo wa Gagwe ka ga ditiro tse di siameng. O umakile ditiro makgetlo a le mane. Mme jaanong o bolela gore, yo o tswelelang a dira ditiro tsa Gagwe ka boikanyegi go fitlha kwa bokhutlong o tla nwa thata ya go busa ditšhaba, mme o tla nna mmusi yo o nonofileng, yo o nang le bokgoni, yo o sa ineeleng yo o ka kgonang go itshokela seemo sepefela ka nonofo e kgolo, mo e leng gore le mmaba yo o lapisang thata o tla senngwa fa go tlhokega. Tsela e a tla busang ka yone ka maatla e tla tshwana le ya Morwa. Se se a gakgamatsa.

Mme a re lebelele tsholofetso re akantse paka eo. Roma e e nang le dithata e e neng e engwe nokeng ke puso, e e neng e na le dikgosi le masole le batlhomamolao, e ne ya thubagana le go silega e gosomana fa pele ga yone. O bolaile didikadike tsa batho mme o nyoretswe go bolaya didikadike tse dingwe gape tse di sa mo obameleng. O dira gore dikgosi di se ka tsa mo itshokela kana o di dira gore di ye kwa tlase fa a kgona. Ee, go itshunya nko ga gagwe tota go dirile gore ditšhaba di we ka gonne o ikaeletse gore o tla senya ba ba tlhophilweng ba Modimo. Ditiro tsa gagwe ke tsa ga diabolo, ka gonne le ene ke mmolai e bile o bua maaka fela jaaka ene. Mme go tla tla letsatsi le Morena a tla reng, "Tlisang baba Bame ba fa pele Game mme le ba bolaye." Jalo basiami ba tla bo ba na le Morena wa bone fa a bogale ja Gagwe bo wela batlhapatsi. Basiami ba tla tla le ene ka kgalalelo, ba tla senya ba ba neng ba senya lefatshe le go tsoetsa Baitshephi ba Modimo mekubukubu. E e ne e le paka ya go se ipusolotse, ya pitlagano e e botlhoko; mme go tla letsatsi le boammaaruri bo tla fenyang ka lone mme ke mang yo o tla kgonang go kgonang go emelana le molelo wa lone mme a sireletsege? Ke ba ba golotsweng ke Morena fela.

*"Ke ba ba golotsweng ke Morena fela."*

Go ya ka Tshenolo 22:16 le 2 Petere 1:19, Jesu ke Naledi ya Moso.

*"Ke Nna modi le losika la ga Dafita, ke Nna naledi e e phatsimang ya masa."*

*"Go fitlha letsatsi le tllhaba, mme naledi ya masa e tllhaba mo dipelong tsa lona."*

Ka jalo, Mowa o solofetsa bakgetlhwana ba Paka ya Lefifi malebana le Ene ka boEne le mo dipakeng tse di tlang.

Jaaka re setse re boletse, Jesu o itlhalosa e le morongwa wa paka nngwe le nngwe. Ba amogela tshenolo ya Lefoko e e tswang kwa go Ene ka paka nngwe le nngwe. Tshenolo e ya Lefoko e tllisa bakgetlhwana ba Modimo go tswa mo lefatsheng le go nna seoposengwe ka botlalo le Jesu Keresete. Barongwa ba ba bidiwa dinaledi ka gonne ba phatsima ka lesedi le le adimilweng kana lesedi le le bontshiwang la Morwa, Jesu. Gape di bidiwa dinaledi ka gonne ke 'ba ba tshotseng lesedi' bosigo. Ka jalo, mo lefifing la bolelo, ba tllisa lesedi la Modimo mo bathong ba Gagwe.

Re mo dipakeng tsa Lefifi. Go lefifi thata ka gonne Lefoko la Morena le fitlhetswe batho ka botlalo. Kitso ya Mogodimodimo e ratile go nyelela. Leso le ne le fentse bontsi ja bakeresete go fitlhelela maemo a bone a nyelediwa gotlhelele. Dilo tsa Modimo di ne di le maswe thata go fitlha ka nako eo, mme go ne go lebege ekete Satane o ne a tlla fenywa batho ba Modimo.

Fa go ne go na le batho ba ba neng ba tlhokile tsholofetso ya go amogela lefatshe le le senang bosigo, e ne e le batho ba tshedileng ka Dipaka tsa Lefifi. Ke gone ka moo Mowa o ba solofetsang naledi ya moso. O ba bolelela gore Naledi e Kgolo, eleng Jesu, Yo o nnang mo Leseding le go senang motho ope yo o ka atamelang kwa go lone, o tlla ba bonesetsa mo bogosing ja mo isagweng ka go nna gone ga Gagwe ka namana. Ga a kitla a tllhola a dirisa dinaledi (barongwa) go bonesa mo lefifing. E tlla bo e le Jesu ka boene, a bua le bone ba lebane mo matlhong fa a ntse a ba naya bogosi ja Gagwe.

Ke naledi ya moso e e bonalang fa lesedi la letsatsi le simolola go phatsima. Fa Letsatsi la rona, (Jesu) le tlla, ga go kitla go tllhola go tllhokega barongwa; O tlla re tllisetsa molaetsa wa gagwe wa boitumelo ka boEne; mme jaaka a busa bogosi ja Gagwe, mme re tshela mo go Ene, lesedi la Lefoko le tlla nna le phatsima thata mo letsatsing la rona le le itekanetseng.

Ke eng gape se re ka se eletsang go feta Jesu ka boEne? A ga a sengwe le sengwe, tota le sengwe le sengwe se se itekanetseng?

Yo o nang le tsebe a a utlwe se Mowa o se bolelelang diphuthego". Amene. Le fa go ntse jalo, Morena Modimo, re dire gore re utlwe bommaruri ba Gago ka Mowa wa Gago.



[www.messagehub.info](http://www.messagehub.info)

Thero Ka

**William Marrion Branham**

"... Mo Metlheng ya Lentswe la Moengele wa Bosupa ..." Tshenolo (10:7)